

清  
回  
世  
文



本  
書  
暫  
不  
借  
出



友  
朋  
圖  
書  
館

全  
一  
冊





627.00  
8139-1  
清宮史略叙



國朝宮史三十六卷分列六門曰訓諭曰典禮曰宮殿曰經費曰官制曰書籍  
乾隆七年勅修二十六年復輯至嘉慶十一年又成續編一百卷體例與前編  
略同均繕寫本藏內府備御覽外廷不能見也有清一代家法最嚴起居出入  
皆有定章毋得踰越列朝訓諭諄諄告誡惟恐失之爲歷代所未逮道咸以後  
朝政或有更新而宮規一仍舊貫及慈禧皇太后訓政臨朝既久偶事遊宴常  
駐別苑舊制乃稍稍廢矣聞太后嘗欲自選宮監內務府大臣榮祿以非祖制  
執宮中則例以爭太后無以難之乃以私窺祕檔爲言竟斥之退實則內廷諸  
臣例得預聞非其罪也梁奉命入直特請頒發是書同列傳觀藉爲法戒並按  
類摘抄以便檢閱名曰宮史錄要宮史向貯懋勤殿梁文忠公會擬錄副刊行



方繕前編而公遽薨不及付刻梁乃繼錄續編並擬集嘉道以至光宣關於宮闈故事重編宮史合刊全書庶足備一朝宮廷之典要直廬夜宿夢想康乾徒增感歎而已甲子春三月金梁識於內務府直廬

右叙作於十年前宮史正續百三十六卷卷帙過鉅實以御製詩文爲多余昔爲錄要仍覺較煩近乃重加編次盡去繁文惟存事實旣爲標目復增按語如哈哈珠子義譯男子即侍衛阿木孫章京即司胙官等類皆爲詳釋又以原書輯至嘉慶十一年止復取嘉道至光宣關於宮闈之事會見官書者擇記大略附以補輯刪繁就簡文省事增遂易題曰清宮史略於是有清三百年宮廷掌故彙於斯編欲考清宮故事者手此一卷可以一覽而盡知矣癸酉冬大雪息侯金梁再識

# 清宮史略總目

## 卷首

諭輯宮史

重修宮史

宮史總目

續修宮史

宮史續編總目

## 訓諭

裁定內官

立鐵敕

吳良輔

哈哈珠子

敬事房

視朝晷刻

每日御門

吉徵房

家奴淨身

太監殺人

梁九功

明季內監

皇子禮師

太監守規矩

廷試賜火

太監宿衛

膳房惜食

城門合符

收拾板房

挑選宮女

阿木孫章京

內廷阿哥

內監交談

旂下太監

御前太監

宮中則例

太監做賊

奏事處

清查陳設

內右門出入

造辦處工匠

當今法會

節用

停止太監讀書

紅帽套

高雲從

綿德阿哥

殷姓女子

九經三事殿

諭重謁陵

惇妃

五世一堂

紅絨結

西二所

南府學藝

文獻通考

戒改衣冠

乾清宮交泰殿災

實錄修貯

入宮盪樣

他坦

盛京陵寢宮殿

內膳房外膳房

書房課程

尊藏硃筆

東五所



A541 212 0014 97678

# 典禮

御船拖床

門禁

太和殿視朝

御門聽政

常日視事

經筵進講

御殿傳臚

殿試讀卷

紫光閣武試

懋勤殿勾到

太和殿元會宴

乾清宮宴親藩

乾清宮

見屬國陪臣

乾清宮曲宴廷臣

重華宮茶宴

瀛臺錫宴

豐澤園凱宴

紫光閣慶成宴

紫光閣凱宴

紫光閣宴外藩

文淵閣賜宴

乾清宮普宴宗室

惇叙殿宴宗室

皇帝萬壽三大節內廷慶賀

乾清宮家宴

萬壽盛典

萬壽慶典

千叟宴

乾清宮千叟宴

皇極殿千叟宴

太上皇帝萬壽宴儀

皇太后萬壽三大節內廷慶賀

慈寧宮筵宴

皇帝躬侍皇太后家宴

聖壽恭祝

皇貴太妃千秋祝壽

皇后千秋三大節內廷慶賀

皇后千秋內宴

冊尊皇太后及恭上徽號

徽號慶禮

冊尊太妃

冊立皇后

元妃正位

冊封皇貴妃貴妃妃嬪

冊封公主及公主下嫁

錫封皇子及皇子婚儀

授受詔

冊立皇太子儀

傳位大典籌備條款

授受儀

齋戒

閱祝版

坤寧宮祀神

求福祀神

奉先殿饗祀

壽皇殿饗祀

殿龕供奉

令節設供

令節設醮

天一門斗香

祀竈

先蠶壇饗祀

交泰殿國寶

高帝御同寶

御寶開封

冊寶



# 宮殿

各宮位號

皇太后宮問安

恭進實錄聖訓

賞賜福字

進時憲書

進春

進春帖子

萬壽燈聯

張掛春聯門神

張掛宮訓圖

張掛春屏綵勝

懸掛椒屏歲軸

尊藏先朝法物

皇子就傳

加恩幼侍

選看秀女

宮女額數

宮內規則

宮中門禁

宮殿事宜

冠服

儀駕

外朝

皇城

紫禁城

御河

大清門

天安門

太廟

社稷壇

端門

午門

太和門

太和殿

中和殿

保和殿

文華殿

文淵閣

傳心殿

三所

武英殿

內務府

咸安宮

南薰殿

內廷

乾清門

乾清宮

昭仁殿

弘德殿

端凝殿

懋勤殿

批本處

內奏事房

敬事房

交泰殿

坤寧宮

御花園

摘藻堂

東長街六宮

西長街六宮

齋宮

重華宮

建福宮

養心殿

奉先殿

慈寧宮

壽康宮

壽安宮

寧壽宮

毓慶宮

壽皇殿

景山

雍和宮

西苑

勤政殿

瀛臺

補桐書屋

寶月樓

淑清院各景

豐澤園

紫光閣

承光殿

萬善殿

永安寺

悅心殿慶霄樓琳光殿

闕古樓

漪瀾堂

春雨林塘畫舫齋濠濮間諸景

蠶壇

西天梵境

五龍亭

闡福寺

快雪堂

# 經費

鋪宮

年例

日用

恭進

恩賜

吉禮例用

嘉禮例用

筵宴例用

錢糧事例

# 官制

內監官制

欽定則例

處分則例

宮監額數職掌

# 書籍

實錄

聖訓

御製

欽定

方略

典則

經學

史學

儀象

志乘

字學

類纂

總集

類書

目錄

鑒藏

校刻

石刻

圖畫

輿圖

# 跋尾

宮史錄副

宮史續編錄副

宮史錄要

# 清宮史略

金 梁輯

## 卷首

諭輯宮史

乾隆七年十一月諭近閱明朝宮史一書凡五卷作者曰蘆城赤隱詞雖淺俚所紀皆宮廷事實使後有所考蓋勝國晚季中涓所爲也論者謂明不亡於流賊而亡於宦官明代皇城以內外人不得入禁城以內朝官不得入奏事者至午門而止中外阻絕人君所與處者惟若輩羣臣有數十年不得望見顏色者而鬼蜮之計得行其失皆由不與士大夫相接耳我世祖御極即立鐵牌永禁內監干政迄今百有餘年從無一人能竊弄威福者列祖勤政親賢自朝以至

日中視事者十數刻召對廷臣者十數刻披閱本章者十數刻若乾清宮若弘德殿若養心殿皆大內禁廷大學士九卿日接跡其間咨詢延訪外至末僚微弁外藩遠使舉得進見明代內監多至萬餘人我朝內官不過四品通計人數御前暨各宮外及苑囿纔二千餘人後此不得增額夫祖宗立綱陳紀垂之典則者若此朕之防微杜漸謹其操柄者又若此不有成書奚以行遠朕意欲輯本朝宮史一編著大學士鄂爾泰張廷玉徐本率南書房翰林等詳慎編纂書成繕錄三冊一貯乾清宮一貯上書房一貯南書房

宮史卷首

按初修宮史何日告成未見明文乾隆三十四年有前修宮史閱時既久著再增修之諭想早纂成呈進後已散失今所見者皆乾隆三十四年重修本也

重修宮史

乾隆二十四年十一月諭前修宮史閱時既久且多草率缺略之處著再增修  
令蔣溥裘曰修王際華錢汝誠董其事 卷首

乾隆二十六年十二月諭重辦宮史添派于敏中並著陳孝泳幫同校錄 卷  
首

乾隆三十四年十二月于敏中王際華裘曰修奏奉敕纂輯國朝宮史告成訓  
諭四卷典禮六卷宮殿六卷經費三卷官制三卷書籍十五卷統三十六卷裝  
成恭進 卷首

宮史總目

宮史總目一訓諭分世祖諭旨聖祖諭旨世宗諭旨高宗諭旨四目二典禮分



禮儀宮規冠服儀衛四目三宮殿分外朝內廷景山西苑雍和宮五目四經費分鋪宮年例日用恭進恩賜吉禮例用嘉禮例用筵宴例用錢糧事例九日五官制分條例額數職掌二目六書籍分實錄聖訓御製方略典則經學史學儀象志乘字學類纂總集目錄類書校刊石刻十六目 卷首

續修宮史

嘉慶六年二月慶桂董誥彭元瑞王杰朱珪紀昀豐紳濟倫文寧等奏上年面奉諭旨續修宮史原書於乾隆二十六年纂成書列六門茲擬於乾隆二十七年以後仍照原書六門別增子目如典禮門授受儀千叟宴宮殿門寧壽宮文淵閣等臚纂詳備另爲續編奉旨依議 續卷首

嘉慶十一年十二月慶桂董誥德瑛玉麟劉鳳誥英和陳崇本施杓法式善等

奏國朝宮史續編告成計一百卷進呈 續卷首

宮史續編總目

宮史續編總目一訓諭分高宗諭旨仁宗諭旨二目二典禮分盛典冊寶祭祀  
勤政宴賚宮規冠服儀衛八目三宮殿分外朝內廷西苑三目四經費分尊藏  
法物舖宮恩賜例用吉禮例用嘉禮例用筵宴例用節省事例支發事例八目  
五官制分恩卹則例恩賞則例處分則例額數職掌四目六書籍分實錄聖訓  
聖製御製御題鑒藏欽定方略典則經學史學志乘字學類纂校刊石刻圖像

圖刻圖繪十九目 續卷首



# 訓諭

## 裁定內官

順治十年六月諭古用寺人宮禁役使勢難盡革朕酌量設置首爲乾清宮執事次爲司禮監御用監內官監司設監尙膳監尙衣監尙寶監御馬監惜薪司鐘鼓司直殿局兵仗局滿洲近臣與寺人兼用寺人不過四品凡內員非奉差遣不許擅出皇城不許干涉外事不許交結外官不許假名置產其在外官員亦不許與內官互相交結如有覺察糾參審實一併正法仍明諭中外刊刻滿漢字告示咸知 訓一

按是爲十三衙門多沿明舊至順治十八年聖祖御極罷十三衙門以其

事歸內務府並創設總管內府大臣統之

立十三衙門鐵敕

順治十二年六月諭中官之設雖自古不廢然任使失宜遂貽禍亂近如明朝王振汪直曹吉祥劉瑾魏忠賢等專擅威權干預朝政足爲鑑戒今裁定內官衙門及員數執掌法制甚明以後但有犯法干政竊權納賄囑托內外交結官員越分奏事上言官吏賢否者即行凌遲處死特立鐵牌世世遵守訓一

按鐵牌高四尺五寸廣一尺九寸厚一寸鑄設內務府今存

吳良輔

順治十五年三月諭內監吳良輔等交通內外官員作弊納賄罪狀顯著即行逮治其餘株連姑從寬免訓一

按順治十八年聖祖御極諭曰太祖太宗不設宦官先帝遺詔亦云祖宗創業未用中官前由滿洲佟義內監吳良輔變易舊制倡立十三衙門名色假竊威權要挾專擅罪大惡極吳良輔已經處斬佟義已伏冥誅十三衙門盡行革去內官俱永不用凡事皆遵定制行之

### 哈哈珠子

康熙十五年二月諭朕在花園有哈哈珠子往來奏事必先著太監各處傳知然後遞行領送嚴密關防不可忽略 又諭凡大臣進宮奏事講書時先曾傳過不許放女人行走如看守各門太監不行禁止著哈哈珠子參奏 訓二

按哈哈珠子譯義爲男子初制令東三省選送三音哈哈譯曰好漢子賞充侍衛此言奏事及參奏蓋即侍衛之類也

敬事房

康熙十六年五月諭設立敬事房屬內務府管轄專司宮內一切事務奉行諭旨及承行內務府各衙門一切文移凡事俱照定例敬謹奉行 官一

按自罷十三衙門後宮內事務皆歸內務府總其成至是始設敬事房由內監承旨奉行

視朝時刻

康熙二十一年九月諭朕御朝太早各官於三四鼓趨赴朝會殊爲勞瘁自今以後朕每日御朝聽政春夏以辰初刻秋冬以辰正刻爲期啓奏各官從容入奏九卿詹事科道原係會議官員仍每日於啓奏時齊集午門此外各衙門及部院司屬官俱免每日齊集各赴本衙門辦事每月常朝仍照舊行 補輯



每日御門

康熙二十三年諭御史衛執蒲等奏請御門聽政或以五日或以二三日爲期朕自躬親庶政宵旰勿違念致治之道務在精勤勵始圖終勿宜有間每日聽政面見諸臣咨詢得失習以爲常若必預定三日五日以爲奏事常朝非朕始終勵精之意也又二十九年三十二年迭有奏請均不准行

補輯

吉徵房

康熙二十四年正月諭內務府總管吉徵房爲三宮女子養病而設如何在皇城遠處又復污穢不堪着移在皇城內幽僻處所掃除潔淨

訓二

家奴淨身

康熙二十四年二月滿洲家奴及太監家奴有逃走在外私自淨身者不宜內

用查交禮部發回原主嗣後着嚴禁止 訓二

按內監約分三等一由內務府挑選皆自幼淨身自願入宮當差者二由各王府挑進皆在各府當差年久者三由太監名下投進皆私自淨身求入當差者家奴淨身即第三等之類也

太監殺人

康熙三十三年閏五月諭三法司題奏太監錢文才打死民人徐二應絞監候凡太監殺人斷不可宥尤宜加等治罪古來太監良善者少要在人主防微杜漸慎之於始太監原屬陰類其心性與常人不同有年已衰老而言動尙若嬰兒外似謹厚中實叵測聞明代諸君將本章批答委之司禮監司禮監委之名下太監此輩素無學問不知義理其能免舛謬耶錢文才此案爾等記之至秋

審時勿令倖免 訓二

### 梁九功

康熙三十九年九月諭用太監不過取其當差勤謹老實寡言穩重即如梁九功人甚伶俐凡有差遣朕尙時加防範今看毓慶宮內俱是少年首領並無有年紀之人高三變雖言語鈍拙而辦事誠實賈應選趙國士謹慎老實可以當得首領送與皇太子去 訓二

### 明季內監

康熙四十八年十一月諭明季事蹟萬歷後所用內監曾有在御前服役者故朕知之獨詳正統在沙漠嘗生一子今有裔孫現在旗下天啓呼魏忠賢爲老伴陳新甲所議本受指於崇禎及科道交章彈劾反歸咎於陳實非其罪也流

賊攻城崇禎率內監至襄城伯家方閉門演戲不得入回登萬壽山猶欲出奔王承恩止之乃以身殉國明朝費用甚奢宮中脂粉銀四十萬兩供應銀數百萬兩紫禁城內地磚七層俱派民間宮女至九千人內監至十萬人日有餓死者今則宮中不過四五百人而已又明季所行多迂濶可笑建極殿後階石高厚數丈方整一塊採運至京不能舁入太監參奏此石不肯入午門乃命將石網打六十御棍崇禎嘗學乘馬兩人執轡兩人捧鐙兩人扶鞦甫乘輒已墜馬乃責馬四十如此舉動豈不發噱總由生于深宮長于阿保之手不知人情物理故也 訓二

康熙五十三年六月諭明末流賊自南來京兵盡發保定後賊從居庸關入攻京師城內無兵祇太監百姓官員家人防守七日城即陷平日太監專權人主

不出聽政大臣官員俱畏懼太監以致誤事又萬歷年有太監奏庫內積銀二百萬兩應入大內遂盡收養心殿後掘窖埋藏後欲取用已無用矣今我朝庫銀有數千萬兩若收進埋藏亦安所用 訓二

### 皇子禮師

雍正元年正月諭諸皇子入學之日與師傅預備杌子高桌皇子行禮如不肯受皇子向座一揖以師儒之禮相敬朕爲藩王時在府中亦如此行此古禮也 訓三

### 太監守規矩

雍正元年八月諭太監等見諸王大臣官員進內必須起身站立行走之際必然讓路存一番恭敬倘有無禮之人定不輕恕 又十一月諭凡王大臣及外

國使臣進內太監等俱要整肅規矩不許斜倚跛立互相私語所有不守規矩內監交與王大臣查拿治罪 訓三

廷試賜火

雍正元年十月諭本月二十七日太和殿廷試天氣寒冷著總管將大火盆多爲豫備免致筆硯凝凍 訓三

按廷試原於冬季舉行並在殿廊後始改於孟夏並准入殿內左右列試  
太監宿衛

雍正二年五月諭將外圍太監揀選二百名在暢春園學習弓箭鎗刀優者賞以千總把總分作兩班宿衛 訓三

膳房惜食

雍正二年六月諭膳房凡粥飯及肴饌菜類食畢有餘不可拋棄溝渠或與服役下人食之人不可食者則哺貓犬再不可用則曬乾以飼禽鳥斷不可委棄派人稽查如仍不悛改必治以罪 訓三

### 城門合符

雍正四年八月諭夜間遇有開城門事著造辦處製合符四件一交乾清門一交左翼一交右翼其一收貯宮內凡夜間開門合對爲憑 訓三

### 收拾板房

雍正五年十月諭內左門內右門兩邊板房原爲王子大人等設立近被粘竿上人等作踐現在延信岳鍾琪將到將內左門外板房收拾給外省大人兩間六部大人三間延信岳鍾琪兩間俱著粘竿上人等打掃如再作踐定即究治



前曾降旨賞大人等飯日久恐其懈怠傳與膳房小心備辦 訓三

挑選宮女

雍正七年六月諭嗣後挑選使令女子凡皇后妃嬪貴人宮內者官員世家之女尙可挑入如遇貴人以下不可挑入官員世家之女 訓三

按宮中使令女子即宮女亦稱官女子皆由挑選其下有家下女子專供服役則由招雇如俗稱老媽也

阿木孫章京

雍正九年九月坤寧宮神前祭肉理宜專心恭敬乃阿木孫章京等全不經心近來祭肉頗覺無味今特交嚴查如仍前無味俱不輕恕 訓三

按阿木孫章京譯名爲司胙官以內府員司充之又按滿洲舊制祭祀敬

神祭肉例不准出殿門原承不留神惠之意故以分食祭肉爲大典

### 內廷阿哥

雍正十三年十月高宗諭太監等乃鄉野愚民至微極賤當自揣分量敬謹小心凡諸王大臣尋常接見自應恭謹盡禮豈得與奉旨宣諭時一樣舉止乎至內廷阿哥等舊制無論王公大臣俱行跪見請安之禮惟親伯叔行乃免跪見爾等微末太監豈得以阿哥等年尙冲幼遂爾怠忽耶嗣後尋常接見王公大臣禮貌必恭言語必謹不可稍涉驕縱至接奉內廷阿哥必當拜跪請安賜坐必當席地內宮宮眷雖答應之微阿哥家眷雖官女子之微爾總管不可不跪拜也若總管太監等仍不遵定制經朕察出首犯之人立行正法著將此旨亦傳諭阿哥等知之 訓四

內監與李衛交談

乾隆三年九月諭奏事太監王賞貴等擅與李衛交談伊等身係內監如何與總督聚語着一併議罪 訓四

旂下太監

乾隆四年十二月諭旂下太監不可在近便隨侍等處當差只宜外圍熟火打掃處服役十數年試看果好再往內圍挑補 訓四

御前太監

乾隆六年十二月諭昨頒賞太監等摺內寫御前小太監甚屬錯誤從前魏珠陳福服勤日久各有身分稱爲御前太監新進小太監等如何寫御前字樣著嚴傳禁止 訓四

宮中則例

乾隆七年二月諭傳知各處首領太監等今年所定宮中現行則例使爾等太監永遠遵循 訓四

太監做賊

乾隆九年二月諭太監中竟有做賊之人皆因總管太監平日不加約束又不稽查之故養心殿失去銀兩查出張玉偷盜着帶至甕山傳齊衆太監觀看即行杖斃 訓四

奏事處

乾隆十年十一月諭乾清門及傳奏事處太監只可當差接奏事件不應與外廷官員交言總管等實力稽查並嚴行傳諭不許與王子大人往來交好

訓四

清查陳設

乾隆二十一年六月諭敬事房所司官物錢糧向無查核嗣後著年終具奏交養心殿存查養心殿所司官物陳設亦年終具奏交敬事房存查至四執事等處特派清查將元年至今所有舊管新收開除實在數目徹底查明此後每年年底著本處開明具奏其乾清宮等處凡有官物陳設亦著年終開具四柱彙奏俱交敬事房存查 訓四

內右門出入

乾隆二十六年十月諭養心殿召見滿漢大臣向例由乾清門行走惟御前內廷軍機大臣等由內右門行走自後召見大臣有年逾七旬者俱令由內右門

出入以昭優眷 訓四

造辦處工匠

乾隆二十八年十月諭造辦處工匠向令蘇州織造及粵海關監督等挑選送京往往到京未久輒行藉詞告假此後挑選時應擇手藝精工而無家累者送京可省告假往返之煩續訓一

當今法會

乾隆三十一年五月諭朕於二十二歲時皇考世宗憲皇帝因辦當今法會一書垂問有號否謹以未曾有號對因命朕爲長春居士和親王爲旭日居士朕之有號實由皇考所賜然亦從未以之署欸題識昨見十五阿哥所執扇頭十一阿哥落款作兄鏡泉三字實非皇子所宜皇子讀書惟當講求大義期有裨

於立身行已尋章摘句已爲末務至於飾號美觀何裨實濟豈可效書生陋習流於虛謾而不加察乎 續訓一

節用

乾隆三十三年七月諭恭閱聖祖實錄康熙年查前明光祿寺每年送內用各項錢糧二十四萬兩今年用三萬餘兩每年木炭二千六百八十六萬觔今止用六七百萬觔每年紅羅等炭一千二百八十萬觔今止用一百餘萬觔前代宮女至數千人今乾清宮妃嬪位下使用宮女老嫗合計止一百三十四人現在查內廷每年及茶膳房止用木炭二百四十五萬觔紅羅等炭共七八十萬觔光祿寺錢糧每年並無送內動用之欸至宮女子現在內廷主位下使用止一百零四人較之康熙年間更屬減少 續經三



按高宗節儉論明季宮中歲用七十萬兩至康熙年祇用七萬兩今令內務府查一歲度支則稱乾隆三十年以三萬計四十年以二萬計云云  
停止太監讀書

乾隆三十四年十一月諭萬善殿向有年幼太監十餘人在內讀書前明闕豎檀政司禮秉筆由使若輩通文便其自利太監職在供給使令即不識字何礙或閒有登記檔冊但能粗辨字畫足矣又何必選派科目人員與之講授著另派內務府筆帖式略授句讀所有萬善殿派用教習之例永遠停止 續官一

### 紅帽套

乾隆三十八年九月諭今日下雨時見太監等戴用紅帽套者甚多嗣後只准總管首領奏事太監詩本太監養心殿首領小太監等戴用其餘俱不准戴紅

帽套 續訓二

按詩本太監專供繕錄御製詩文有板房在養心殿門左即稱爲詩本高雲從

乾隆三十九年七月諭太監高雲從漏洩道府記名我朝家法太監止供使令從不許干涉政務至外廷臣工尤爲禁絕往來若此次不行整飭不知何所底止向來京外陳奏摺件設有奏事官接遞轉交奏事太監進呈所以嚴內外之防使宦寺人等概不得與外人交接法至善也嗣後各衙門奏摺悉從奏事官員接收轉交即內務府一切事件亦由奏事官員轉交概不得由奏事太監接奏大臣官員並不得與太監交談如再違犯必從重治罪 續訓二

綿德阿哥

乾隆四十一年正月諭綿德阿哥賞給禮部郎中秦雄褒字畫食物並經相見送禮一節此事甚有關係阿哥等不當與外人交接秦雄褒非若書房行走之翰林可比何所爲而必欲謁見綿德綿德又何所爲而必欲認識秦雄褒乎若不示以懲儆恐諸皇子皇孫無所畏憚綿德着革去王爵作爲閒散宗室秦雄褒著革職即日發往伊犁不准贖罪 續訓二

### 殷姓女子

乾隆四十年十一月諭前賞給十一阿哥使喚之殷姓女子其父兄現在來京投至府中據稱想念伊女到京投望今即料理回家等語此等賞給阿哥女子非有名號自不便歸入內務旂分給以養贍但伊等或因其女在阿哥府內即視爲榮貴倚恃生事此風斷不可長今旣詢無別項情節祇須遣回本籍毋庸

查辦 續訓二

按十一阿哥即成親王殷姓女子即宮女賞給侍候者也

九經三事殿

乾隆四十二年正月諭奉移皇太后梓宮於暢春園之九經三事殿易蓋黃瓦所謂禮緣義起若圓明園之正大光明殿自皇考及朕聽政於此恐萬年後子孫或援九經三事之例改換黃瓦則大不可至園內之長春園及宮內之寧壽宮乃朕茸治爲歸政後所居將來子孫均不宜輕事更張 續訓二

諭重謁陵

乾隆四十二年九月諭朕此次詣盛京恭謁祖陵蹕路出山海關憑覽關城屹然重鎮明季重兵拒守以當時盛京而論有此關控扼內外聲氣不能貫注即

由他路入邊而彼終得撓我之後所以天聰年太宗進圍燕京仍復釋之而去未嘗不籌慮及此泊乎吳三桂開關迎師一戰而定統一寰宇所謂在德不在險者於此益覓溯自興京肇迹遼瀋遷都業基於勤而謀成於斷皆世世子孫所當深念盛京爲根本重地發祥所自後世不可不躬親閱歷凡我子子孫孫紹登大統者可不體朕志以爲志倦懷舊疆再三周歷蕲於祖宗遺緒身親而目覩哉或輕視故都而憚於遠涉或偶詣祖陵而視同攬古是則忘本而泯良實不願我後嗣之若此也 續訓二

### 惇妃

乾隆四十二年十一月諭昨惇妃將伊宮內使喚女子責處致斃事屬駭見若不從重辦理不足使備位宮闈之人咸知警畏第念曾育公主姑從未減即著

降封爲嬪以示懲儆 續訓二

按惇妃所育爲和孝公主即下嫁和紳之子豐紳殷德者也

五世一堂

乾隆四十九年正月諭皇孫綿德前革王爵加恩封公綿德爲皇長子定安親王嫡長子係朕長孫今綿德之子奕純新歲得子朕慶抱元孫五世一堂實爲盛事自應特沛恩施綿德着晉封固山貝子以誌奕禩雲祚之慶 續訓三

紅絨結

乾隆五十三年十二月諭皇子皇孫等俱戴紅絨結頂帽載錫係朕元孫亦應戴紅絨結嗣後曾元孫阿哥等俱着戴紅絨結頂帽俟分封後再行量職戴頂

續訓三

西二所

乾隆五十五年正月諭朕爲皇子時自毓慶宮遷居西二所踐祚後升爲重華宮漸次將四五所構爲建福宮敬勝齋等實爲興祥之所至東五所內爲年少皇子皇孫公共所居若照重華宮之例另行興建不特宮牆四周別無隙地亦非垂示後昆之意不如一循舊制之爲善也 續訓四

南府學藝

乾隆五十六年諭南府學藝人等爲歲時宴會所備用內有京師漢人蘇州優伶及太監之弟姪子孫若升入內府三旗勢必分占包衣人等錢糧是以朕將此輩入旗者甚少如果實心黽勉効力有年者或將其一二人酌入包衣尙可第不得任意多入惟恐後世子孫偶失檢點可執此旨毅然諫阻 續訓四

文獻通考

乾隆五十六年九月諭偶閱嘉靖年所刻文獻通考序內有命司禮監重刻以傳之語稽古崇文自應交儒臣詳校精刻乃竟付諸奄豎之手書內句讀及所別四聲多有舛誤即此可見嘉靖年政治朝綱廢弛不講此書不值特加論正着將此旨錄入卷首以示崇實黜浮至意

續訓四

戒改名冠

乾隆六十年十月諭國朝舊典最重祭神如遇有服制百日之內例不薙髮即不舉行祭祀三年之喪通行已久當思天子之孝與士庶異若必泥行此禮則蓄髮三年與前代漢人何異三年不祭神更非吉事且必有因此而愆怠改服制者如北魏遼金元初亦循乎國俗後因惑於浮議改漢衣冠一再傳而失國



祚是以祖宗垂訓無得改用漢人服色實爲萬年貽謀燕翼之道設云天子應服袞冕以祀天則本朝所定朝事之服山龍藻火燦然具列悉皆義本禮經將事郊壇懋膺洪貺更何通天絳紗之足云耶

參三十  
七年諭 若後有循古衣冠之議者即可執此諭以破其迷我世子孫其欽承無忽

續訓五

### 乾清宮交泰殿災

嘉慶二年十月太上皇敕旨本月二十一日乾清宮交泰殿災朕心悚惕寢食靡寧朕紀元六十年傳位皇帝茲春秋八十有七親見五代元孫武功十全諸福具備今上天於默佑之中示以儆戒正足見天心仁愛啓迪朕躬及嗣皇帝我父子祇懼之餘尤深欽感且朕雖已傳位而一切政務仍親理訓示政事有缺皆朕之過非皇帝之過自後益勵懋修勉思補救庶幾消弭災眚敬迓祥和

上答天恩欽承祖訓此尤朕所朝夕乾惕不敢稍自暇逸者也 續訓五

實錄修貯

嘉慶四年三月諭現在恭纂高宗實錄宜擇潔淨寬敞地方因思清字經館頗爲整肅所有繙譯經典現已竣事着將該處作爲實錄館並將清字經館後屋四十餘間一併歸入 又十二年二月諭高宗實錄將屆告成安皮乾清宮西暖閣所有原貯五朝實錄移貯東暖閣 續書一

入宮盪樣

嘉慶四年五月諭總管內務府大臣等奏和珅家太監呼什圖擅入寧壽宮照式盪樣蓋造楠木房屋一案議將並不阻止輒行放入之總管首領各太監各罰錢糧蕭得祿等着罰錢糧一年 續訓六

他坦

嘉慶八年閏二月諭大內門禁關防緊要嚴傳各處他坦內雇覓蘇拉厨役人等俱要知來歷有保人方許留用如有不法無藉之徒即行逐出

續訓六

按他坦即下房爲宮內服役人等所居蘇拉即服役之一也

盛京陵寢宮殿

嘉慶十年八月諭盛京陵寢宮殿年久失修此次朕躬詣陪都特發帑金派員督率修理嗣後每閱二年着派宗室王公大臣數人前往盛京查看一次如陵寢宮殿各處工程有畝損不行修理者即行奏參惟該將軍侍郎等是問

續訓六

內膳房外膳房

嘉慶十一年六月諭管理茶膳房大臣蘇楞額等呈遞奏單內有阿哥內膳房外膳房字樣殊屬錯謬定制惟承應御膳之處稱爲膳房朕前在藩邸時即稱飯房豈可率意書寫非尋常疏忽可比蘇楞額等着各罰俸以示薄懲

讀訓六

書房課程

嘉慶十一年十一月諭向例尙書房師傅春分以後於申正退直秋分以後申初退直近來竟不按例定時刻退直甚早意涉疏懈嗣後遵照一定時刻散直以專課程並仍將散直時刻管門太監按日登記藉備查覈 又十二年五月諭向來尙書房阿哥功課自初伏以至末伏俱係半課嗣後着改於夏至後立秋前作半課其散學時刻俱定每日午初散學其伴課及其師傅每日於巳正

散學著爲例 續訓六

尊藏硃筆

嘉慶十二年七月諭慶桂等奏實錄告成將請出高宗硃筆恭繳應尊藏何處等語列朝硃筆向貯紅本處日久增多世宗硃筆即存十五箱高宗硃筆共有一百八十四箱日積日多所有先朝硃筆恭請至太和殿東夾室永遠尊藏現時各處存繳硃筆仍交紅本處以備查覈 續訓六

東五所

嘉慶十四年十一月諭重華宮本西二所爲皇考潛邸至即位後詔升爲宮朕爲皇子時所居如東華門內擷芳殿之中所宮內之東頭所二所福園門內之西北所現仍准皇子等居住惟毓慶宮爲皇考賜居迨寅承大寶訓政三年朕

尙居此非東五所諸屋可比是以不復令皇子輩居住所以杜中外揣摩之漸著將此子載入宮史續編 續訓六

御船拖床

嘉慶十四年十一月諭西苑路逕稍遠王大臣等內之年老有病者艱於行走嗣後朕赴西苑用膳辦事所有內廷外廷王公大臣等俱在西苑門外下馬步行進門至馬頭着御船處預備船隻照進同樂園之例結冰後即用拖床以示體恤 續訓六

門禁

嘉慶十五年六月前明舊制紫禁城內非特官員等不能輕至即大臣亦祇在外聽宣廷僚召對絕少以致內外隔絕我朝革除一切秕政每日宵衣視事召

對匠工乃至外來道府等官亦准親至宮門遞摺請訓無不隨時召對意在通下情而宣上意然禁城重地守衛不可不嚴體制不可不肅乃近來門禁廢弛閑雜人等任意攔入毫無稽考嗣後各該處值班官兵以及該管大臣等務當認真查禁不可日久復懈如有稽察不嚴私情縱容等事一併嚴懲不貸

續訓六

# 典禮

## 太和殿視朝

視朝典禮每月五日常朝之期得旨升殿凡王公以下加授爵級及職官遷除叙薦遵例謝恩皆於是日行之屆日所司於太和殿內西楹次設案一陳筆硯記注官四立於後展中和韶樂於殿檐前丹陛大樂於太和門檐下鑾儀衛陳鹵簿於丹墀內步輦於太和門外五輅及馴象仗馬均於午門外王以下文武百官朝服外藩諸臣以時至者服本國服色畢會質明侍班執事官入就班位鴻臚寺官按翼引王公由午門左右門入太和門左右門就丹陛位立東西面文武百官由午門左右掖門入昭德門貞度門就丹墀位立東西面外藩陪臣



隨百官後入屆時鴻臚寺奏請御殿午門鳴鐘鼓皇帝禮服乘輿前引後扈至太和殿後降輿中和韶樂作皇帝御殿升座樂止丹墀內三鳴鞭丹陛樂作鴻臚寺官贊排班引謝恩官出班序立北面進跪叩興王公百官行三跪九叩禮退復班次引外藩陪臣出班進行三跪九叩禮退復班次樂止乃賜茶畢三鳴鞭樂作奏禮成皇帝啓座乘輿還宮

續典二十七

按常朝以每月五日十五日二十五日行禮若不御殿則王公列坐於太和門外百官列坐於午門外內務府官列坐於右翼門外移時乃退謂之坐朝

御門聽政

御門聽政於乾清門設御榻門外正中設本案領侍衛內大臣內大臣散秩大

臣及豹尾班侍衛在丹陛下左右立東西面記注官翰林科道官於西階下東面立部院奏事大臣及陪奏官畢集於庭魚貫序立屆時皇帝御輿至門啓扉降輿出闔扉陞座部院奏事官由東階升各就列跪尙書一人奉本匣進跪陳於案退入班首跪奏某事幾件餘以次升奏如前至吏部奏事兼帶各部員引見畢皆退大學士學士升至本案前跪啓匣取折本依次啓奏皇帝降旨宣答大學士等承旨訖興由東階降皇帝還宮 典一

按初制御太和門後改乾清門每日聽政必御門至雍正初始定請旨定期之制凡每日部院所進本有未即奉旨者折下內閣積若干件請旨於某日御門辦事內閣宣示六部三法司至日舉行

又按續編御門之典以御太和門乾清門聽政得名在圓明園則御勤政

殿亦曰御門

常日視事

皇帝每日視事夙興御養心殿暖閣或御乾清宮西暖閣及弘德殿閱列朝實錄寶訓一冊辰刻進膳閱王公大臣名牌頒賜克食既徹乃披覽內外臣工奏摺批答訖下所司隨召見諸臣以次畢乃陞寶座宣引見官部旂大臣引見者各以次捧名籤至御榻前跪呈引班官按序引各官至丹陛跪奏履歷畢皆退帝還便殿若幸瀛臺等處進膳辦事亦如之每日未刻進晚膳閱內閣所進各部院及督撫提鎮本章裁決畢付本房照內閣票簽硃批清字翌日下內閣硃批漢字施行日以爲常 典一

按康熙前以乾清宮爲寢宮每日視事均御乾清宮乾隆後以養心殿爲

寢宮即在殿辦事而視御乾清宮如常朝矣

經筵進講

經筵之禮歲春仲月皇帝將舉經筵翰林院奏派滿漢講官各二員擬題呈覽俟御論發下撰擬講章進呈欽定預備進講屆日皇帝至文華殿於寶座前南向設御案陳御論設講案於殿內正中北向陳講章各侍班官行禮滿直講官出東班趨就案展書進講清文畢退漢講官出西班趨就案展書進講漢文畢退皇帝闡發經義各官跪聆滿漢大學士二人各奏辭感服行禮禮成皇帝由殿後臨文淵閣講官侍班官記注官分左右入賜坐賜茶並宴於本仁殿

續典二十八

御殿傳臚

臚唱之制皇帝御太和殿陳儀奏樂百官序班大學士進奉黃榜出授禮部尙書陳於丹陛案序班官東西分引諸貢士就位跪宣制曰某年月日策試天下貢士第一甲賜進士及第第二甲賜進士出身第三甲賜同進士出身傳臚官唱第一甲第一名以次接傳至丹陛下序班官引出班次就御道左跪第二名就道右稍次第三名就道左又次皆臚傳者三次唱第二甲某等若干名第三甲某等若干名不引班出諸進士聽贊行三跪九叩禮禮部尙書奉榜承以雲盤張黃蓋出太和門中門一甲三名進士隨出諸進士左出昭德門右出貞度門禮成 續典二十九

### 殿試讀卷

每科太和殿策試欽命讀卷大臣八人校閱傳臚前一日辰刻以前列十本進

呈御覽親定甲乙皇帝御乾清宮引前列十人至丹陛跪以次奏名籍畢退立階下帝還便殿讀卷大臣捧卷至內閣填寫金榜翌日皇帝陞太和殿傳臚

典一

保和殿殿試

乾隆五十四年四月諭旨新進士殿試著在保和殿考試照正大光明殿考試之例朝考即照此辦理 續典二十九

按新進士殿試原在天安門外順治十五年改於太和殿丹墀考試雍正年間准入殿內兩旁至是始移保和殿令太監管理茶水等事停光祿寺預備飯食後以爲例

紫光閣武試

每科武試於太和殿策試之明日皇帝親臨紫光閣閱馬步射又次日閱弓刀石技勇御筆皆親加記識既畢以冊授兵部尙書恭按硃筆圈定十八人率至中階下列跪各奏名籍皇帝親定一甲三人二甲五人三甲前列十人內閣填榜次日陞殿傳臚 典一

懋勤殿勾到

歲秋讞九卿會議以聞內閣定期請旨刑部豫進各省情實人犯黃冊至日皇帝御懋勤殿大學士刑部尙書等入跪賜坐咸一叩坐內閣學士啓名單以次舉名奏請皇帝展閱黃冊詳酌宥否其予勾者命大學士執硃筆加勾既畢授紅本處批發 典一

按續編秋審人犯如奉特恩停勾則併於次年照辦至辦理勾到處所在

圓明園則御洞明堂避暑山莊則御依清曠殿盛京則御迪光殿以地非中禁例不備書

太和殿元會宴

元正朝會歲有常儀恭遇萬壽正慶之年及每十年國慶特行宴禮並於太和殿舉行屆日尙茶庀茶尙膳庀御饌王公進饌筵牲酒光祿寺具酒宴兩翼供羊鑾儀衛陳法駕鹵簿於太和殿前以至午門外樂部設樂陳笳吹隊舞雜技百戲武備院張黃幕於丹陛禮部張青幕於丹墀布內外王公一品大臣宴席於殿內前引大臣宴席於寶座前左右後扈大臣宴席於寶座後領侍衛內大臣暨記注官宴席於寶座後左右理藩院尙書侍郎都察院左都御史副都御史宴席於檐下一二品世爵暨侍衛等宴席於丹陛喜起舞大臣宴席於左翼



禮部帶慶隆舞大臣宴席於黃幕左右三品以下文武百官宴席於青幕按序如常朝均東西向外藩使臣宴席於西班牙末皇帝御座各就位行禮進茶行茶進爵大臣進酒賜酒賜果食進饌賜饌管宴王大臣視行酒禮部堂官引慶隆舞諸樂人以次奏技喜起舞大臣十八人朝服入三叩興按隊起舞畢三叩退筳吹進番部合奏進內務府官引朝鮮俳回部金川番童等陳百戲畢各退禮成 續典三十四

保和殿宴外藩

每歲除日賜外藩蒙古王公等宴於保和殿內務府庀饌陳儀布席屆時皇帝御殿行宴禮與太和殿元會宴略同 續典三十四

乾清宮宴親藩

元旦親藩之禮歲於乾清宮舉行豫期請旨欽派近支宗室王公等入宴定制皇子列宗室諸王之上家宴則循長幼爲坐次乾隆甲辰上元庚戌聖壽正日均賜家宴於乾清宮洎嘉慶三年勅於養心殿舉行 續典三十三

乾清宮見屬國陪臣

乾隆年安集延額爾德尼伯克拔達山汗素爾坦沙等遣陪臣入覲詣乾清門請安皇帝陞乾清宮寶座理藩院尙書引入升丹陛三跪九叩賜坐班末賜茶飲訖皇帝召陪臣至御座前親以回語慰問復賜綵緞等物咸叩謝退凡屬國陪臣於乾清宮覲見者儀同 典一

乾清宮曲宴廷臣

皇帝萬壽及元旦上元端陽中秋重陽冬至除夕等節乾清宮曲宴王公大臣

設宴席於殿左右王公高桌椅坐大臣低桌坐褥皇帝陞座進爵大臣進酒宴戲恩賜諸物各行禮如儀 典三

### 重華宮茶宴

每歲新正遇有特召內廷大學士翰林於重華宮茶宴聯句豫進名籤按名宣入宮殿監豫請所司具茶果承應宴戲懋勤殿太監具筆墨紙硯諸臣俱以次一叩列坐御製詩下授簡聯賡宴畢頒賞諸臣跪領退 典三

按續編康熙二十一年正月御乾清宮賜宴羣臣賦詩用柏梁體厥後閒奉舉行不一其地自乾隆八年始歲御重華宮行之是宴例勿授觴飭尙茶以松實梅英佛手三種沃雪烹茶曰三清茶布果釘合爲席詩成頒賞恩禮加隆

瀛臺錫宴

乾隆十一年八月賜王公宗室筵宴於豐澤園欽命皇子及王公宗室等一百三人崇雅殿設宴席易殿名曰惇叙長幼列坐行家人禮庭中張演劇行臺宴畢命王公宗室至淑清院流盃亭等處觀覽頒賜緞綺菓物有差 同日賜滿漢大學士九卿翰詹官員等一百七十六人入宴涵元殿筵宴畢駕幸曲水流觴賦詩並命從宴諸臣聯句頒賜文綺絹箋有差 典三

豐澤園凱宴

乾隆十四年平定金川二十五年平定回部凱旋禮成皇帝幸豐澤園賜宴設帳殿左王公宴席右凱旋大臣等宴席帳殿外幕下凱旋侍衛護軍等宴席皇帝親賜凱旋大臣等酒各至御前跪受一叩飲還坐樂舞善撲百技並作宴戲

畢還退 典三

紫光閣慶成宴

乾隆二十六年正月初二日紫光閣武成殿落成錫宴於閣下命大學士忠勇公傅恒尙書武毅謀勇公兆惠暨滿漢文武大臣蒙古王公台吉回部等一百七人入宴以大學士公傅恒獻爵進皇帝酒皇帝親賜諸臣酒賜進爵大學士立受卮叩飲分賜茶果餽饌於各席樂舞百技並作宴戲畢賜緞疋等物有差

典三

紫光閣凱宴

乾隆四十一年再定兩金川功成初夏吉日上御午門受俘旋幸西苑紫光閣賜凱旋諸將士宴召將軍阿桂參贊海蘭察領隊大臣奎林等手賜卮酒軍機

大臣亦與焉凡宴次舞技畢集金川俘獲番童並陳番中儺戲 續典三十七

紫光閣宴外藩

新正曲宴外藩自雍正年始乾隆年每於豐澤園宴賞泊平定伊犁回部命新紫光閣武成殿移外藩筵宴於閣下歲以爲常四十一年兩金川平土司番目輪覲者准綴斯筵四十年適朝鮮琉球南掌暹羅四國陪臣並集特敕與宴觀禮自是而安南緬甸荷蘭諸國陪臣廓爾喀來使臺灣生番先後以朝正至者咸與焉是宴也蒙古汗王侍子各從品秩列內親王之次優以賓禮行酒時筵吹番樂並作令觀水嬉 續典三十八

按已卯賜宴外藩並荷蘭使臣詩注廣東督臣長麟等奏荷蘭國王以向在廣東貿易近聞大皇帝六十年大慶專差貢使得勝恭賚表貢赴闕叩

賀適新正賜宴外藩因令一體與宴以示懷柔云

文淵閣賜宴

乾隆四十七年四庫全書第一部告成先命建文淵閣藏弄仲春撰吉推進講賜茶例集在事諸臣而宴勞之所以嘉成功示優禮也 續典三十七

是日上御經筵禮成幸文淵閣賜宴總裁總閱領閣事提舉閣事直閣事總纂纂修校理總校分校提調檢閱等咸與所有入坐進茶進酒進果饌均如常宴儀演劇分頒如意文綺雜佩筆墨硯箋有差 續典三十七

普宴宗室

乾隆四十八年初以太祖以下本支十世子姓蕃衍自例膺爵秩外凡宗室閒散一體給予四品頂戴誦吉春正皇帝御乾清宮受賀賜宴欽命皇子以下王

貝勒貝子公暨三四品宗室一千三百八人入宴其以事未入宴者咸與賞合計凡二千人布和碩親王至輔國將軍四十八人宴席於殿內近支將軍侍衛官員宴席於兩廊近支宗室宴席於丹墀左右遠支宗室宴席於甬道兩旁爲席五百三十進茶進饌進酒樂舞行禮分頒如意朝珠文玩銀幣有差

續典三十三

惇叙殿宴宗室

嘉慶九年十月賜宗室王貝勒貝子公等宴於惇叙殿進茶進饌進酒奏樂演劇行禮如儀 續典三十三

皇帝萬壽三大節內廷慶賀

皇帝萬壽元旦冬至三大節御太和殿陳儀奏樂行慶賀禮皇后率皇貴妃貴



妃嬪等集乾清宮俟皇帝前朝受賀禮成還宮垂簾就位行禮禮畢各還陞簾諸皇子皇孫入行禮是時宮殿監率闔宮首領太監在東西丹墀下隨行禮畢各退 典一

### 乾清宮家宴

皇帝萬壽元旦除夕及諸令節乾清宮家宴設御筵於寶座前設皇后寶座宴席於御座東稍後西南向左右設皇貴妃貴妃妃嬪筵席東西向皇帝陞座皇后以下各行一拜禮入座進饌進酒作樂宴戲畢各還 典一

### 萬壽盛典

康熙五十二年聖祖六旬萬壽舉行慶典臣工奏請纂輯盛典釐爲六門曰宸翰曰聖德曰典禮曰恩賚曰慶祝曰歌頌內廷翰林王原祁繪圖 書五

萬壽慶典

乾隆五十五年八旬萬壽舉行慶典皇上御太和殿王公以下百官暨安南國王朝鮮南掌緬甸使臣等行禮進茶賜茶如儀 續典七

千叟宴

康熙六十一年舉行千叟宴與宴王大臣命諸皇子賜觴 續典三十五

按康熙六十一年正月賜千叟宴召滿漢大臣文武官員及致仕退斥人員年六十五以上者三百四十人宴於乾清宮前命諸王貝子貝勒公及閒散宗室等授爵歡飲分頒食品如儀

乾清宮千叟宴

乾隆五十年聖齡古稀有五諏吉春正賜千叟宴於乾清宮與宴諸臣自宗室

王貝勒以下暨內外文武大臣官員致仕大臣官員受封文武官階紳士兵丁耆農工商以及外藩王公台吉回部番部土官土舍朝鮮賀正陪臣之齒逾六十者凡三千餘人其大臣年七十以上官員兵民年九十以上者准子孫扶掖入宮年最高者如百五歲之司業銜郭鍾岳等得隨一品大臣同趨黼座親與賜觴

續典三十五

是日上御殿自殿廊丹墀至甬道左右布席八百奏樂行禮各按坐次入宴進茶行茶進果筵進酒召入宴一品大臣及衆叟中一百五歲至九十歲者至寶座手賜卮酒尋命諸皇子皇孫皇曾孫及侍衛等行酒並分賜果食於各宴席進饌演劇分頒恩賚詩刻如意壽杖朝珠繒綺貂皮文玩銀牌各有差

續典三十五

皇極殿千叟宴

嘉慶初元太上皇帝聖壽八十有六再舉千叟宴禮於寧壽宮之皇極殿與宴席者三千五十六人列名邀賞者五千人上自王公下逮兵民匠藝以至蒙古回部番部朝鮮安南暹羅廊爾喀諸國陪价略其年甲咸集殿墀數逾八千人

續典三十六

是日皇帝奉太上皇帝御殿皇帝進爵太上皇帝召入宴王公一品大臣及衆叟中一百六歲至九十歲者至寶座前手賜卮酒餘如前儀 續典三十九

太上皇帝敕旨本日舉行千叟宴業經普加賞賚所有老民熊國沛年一百六歲邱成龍年一百歲尤屬昇平人瑞加恩賞給六品頂戴其九十以上老民鄧永玘等俱賞給七品頂戴 續典三十六

太上皇帝萬壽宴儀

皇帝侍奉太上皇帝問安視膳日以爲常恭遇萬壽慶節令辰躬親侍宴設  
太上皇帝御筵於寶座前皇帝宴位於寶座東次皇帝奉觴上壽率親王以下  
與宴者行禮獻宴太上皇帝賜皇帝酒樂舞如常 續典三十二

皇太后聖壽三大節內廷慶賀

皇太后聖壽元旦冬至三大節陞慈寧宮皇帝率諸王文武百官行禮畢退皇  
后率六宮公主福晉命婦行禮畢各退內監引皇子皇孫詣太后宮行禮

典一

慈寧宮筵宴

皇太后聖壽及元旦諸慶典慈寧宮筵宴皇太后陞座皇后率皇貴妃以下進

茶進酒皇太后分賜茶賜酒並賜果食餚饌於各席各就本位一拜禮坐樂舞百技並作宴畢還退 典三

皇帝躬侍皇太后家宴

皇帝侍奉皇太后常日問安進甘旨獻時新佳辰令序恭侍宴賞歲新正擇吉恭迎皇太后家宴皇帝親侍於金昭玉粹進早膳寧壽宮進茶果晚膳重華宮進酒膳元夕陳火戲端陽競渡夏日觀荷俱在瀛臺臘八日於慶霄樓進早膳澄懷堂進茶果遐矚樓陳閱冰嬉歲以爲常遇皇太后大慶皇帝稱觴於壽安宮親奉安輿承應宴戲演九九大慶皇后率皇貴妃以下諸皇子皇孫咸侍欽派王公滿漢大臣侍衛外藩於東配殿王妃公主命婦於西配殿各以次列坐觀戲賜酒餚果食 典三

聖壽恭祝

乾隆十六年皇太后六十聖壽先期修葺壽安宮爲奉觴之所王公宗戚京外文武各衙門大臣官員輦下紳士耆老自高梁橋至西華門豫設綵棚樂劇恭祝皇太后自暢春園回宮皇帝乘馬前導王公大臣滿漢命婦各於祝釐綵棚前夾道跪迎皇太后頒賜賞賚各有差

典一

乾隆三十六年聖母皇太后八旬聖壽節上自暢春園奉皇太后御輦三班九老王公宗室滿漢文武大臣庶官及各大臣命婦並在藉紳士老民村婦等各於恭祝萬壽亭前依次跪迎皇太后還宮上侍膳綵衣躬舞捧觴上壽賜三班九老宴遊香山命畫工艾啓蒙繪圖御題九老會詩

續典九

皇貴太妃千秋祝壽

乾隆壬午溫惠皇貴太妃八旬千秋高宗有恭祝詩又戊戌皇貴裕太妃九旬高宗有詩祝壽詩注宮中太妃等曾慶七旬八旬者有之若九旬者則此爲勑見太妃爲和親王母也 續典九

皇后千秋三大節內廷慶賀

皇后千秋元旦冬至三大節皇后率皇貴妃等於皇帝前行禮畢陞交泰殿皇貴妃等行禮王妃公主命婦等俱隨行禮皇后還宮皇子皇孫至行禮 典一

按續編皇后元旦慶賀陳儀奏樂千秋長至俱不設樂

皇后千秋內宴

皇后千秋於本宮筵宴設皇后御筵於寶座前設皇貴妃貴妃妃嬪宴席於左右進酒清樂宴戲如儀皇貴妃貴妃千秋各於本宮以次行禮 典三



冊尊皇太后及恭上徽號

內閣承旨禮部誨吉禮部工部會製冊寶內閣鐫文至日導陳太和殿皇帝恭送至慈寧宮皇太后御座皇帝跪進冊寶率王公羣臣行三跪九叩禮午門外序立百官承傳隨班行禮皆作樂禮成退皇后率六宮公主福晉命婦詣慈寧宮行禮翌日皇帝御太和殿王公百官上表行慶賀禮頒告天下 典一

徽號慶禮

乾隆四十一年平定金川恭上皇太后徽號遵奉懿旨皇帝春秋已越六旬拜跪太久酌省恭閱冊寶一節其餘仍循儀典高宗有禮成誌慶詩注和闐歲貢大玉恭遇加上徽號冊寶即擇最佳者琢爲之於慶典倍昭華貴 續典十二

冊尊太妃

冊尊皇貴太妃貴太妃太妃送冊寶至太妃宮皇帝親詣行二拜太妃起避立座旁是否御殿受賀請旨遵行 續典十三

乾隆四十三年冊尊裕皇貴太妃年屆九旬諭崇慶典皇帝親奉冊寶行禮

續典十三

冊立皇后

定期命大學士一人充冊立使尙書一人充副使內閣禮部奉冊寶陳太和殿皇帝御座宣制曰某年月日冊立某氏爲皇后正副使持節奉冊寶至皇后宮皇后迎入宣冊女官跪奉皇后跪受行六肅三跪三拜禮翌日皇后詣皇帝前行禮 典一

元妃正位

嘉慶元年正月勅旨皇后以元妃正位中宮太上皇帝御乾清宮皇帝皇后恭詣行禮皇帝御太和殿閱冊寶命使冊立如儀 續典十四

冊封皇貴妃貴妃妃嬪

命大學士尙書一人充冊封使侍郎內閣學士一人充副使行禮與冊立皇后略同 典一

冊封公主及公主下嫁

冊封公主爲中宮所出封固倫公主妃所出封和碩公主命下正副使持節往封陳儀奏樂奉冊受冊公主迎送如儀 續典十六

公主下嫁屆期贊事大臣偕額駙詣乾清門東階下跪宣旨今以某公主擇配某人額駙受命行禮誼日額駙家備駝一馬八羊八十有一酒九十尊詣午門

恭進皇帝御保和殿宴額駙父額駙皇后於內宮宴額駙母下嫁前一日額駙率族人詣宮行禮內務府以公主粧奩詣額駙第鋪陳至日額駙家備九九禮物詣午門恭進筵燕如初定禮吉時公主詣帝后行禮畢升輿出宮儀仗導送額駙邸第合巹翼日公主額駙夙興公主詣帝后行禮額駙詣乾清門行禮畢還 典一

格格下嫁乾隆三十五年諭定和碩格格下嫁禮儀尋議宗室王公等格格吉禮本家自備惟特恩由內聘嫁者應酌定規制郡主下嫁朝臣成婚聘禮馬七鞍七宴五十席酒五十瓶羊三十六隻茶五十桶納采均不進禮物停宴陪嫁女六名人四戶縣主郡君縣君鄉君以次遞減下婚外藩郡主納采駝一馬四羊四無宴成婚聘禮馬六牛六羊六十宴三十六席酒三十六瓶羊三十六隻

茶二十八桶陪嫁女六名人四戶縣主郡君縣君鄉君以次減宴茶光祿寺備  
羊酒額駙家備 續典十六

錫封皇子及皇子婚儀

皇子賜名始稱皇幾子及歲錫封爵位各如其儀未封以前均照親王儀制

典一

皇子婚儀指婚命下內務府飭備儀物禮部轉行本旗知會福晉家屆期贊禮  
大臣偕福晉父詣乾清門東階下跪宣旨今以某氏女作配與皇子某爲福晉  
福晉父承旨行禮退迺誨吉納幣婚前一日福晉家以粧奩送皇子宫屆日皇  
子如福晉家行迎娶禮先回福晉升輿儀仗導行至皇后殿前降輿女官恭引  
入宮行合巹禮翼日皇子及福晉夙興詣皇帝后子行朝見禮退皇子仍如福

晉父母家行禮凡筵宴日並行知宗人府八旗蒙古漢軍都統傳二品以上大臣命婦齊集 續典十六 典一

皇孫婚儀於奉旨指婚後內務府飭備儀物所有筵宴齊集禮儀會同禮部具奏遵行 續典十六

授受詔

乾隆六十年高宗紀元周甲諏吉於孟冬頒朔以前九月初三日冊立皇太子宣示中外以來歲元旦行授寶禮即以是年爲嗣皇帝嘉慶元年詔曰朕踐阼之初即默禱上天若得在位六十年當傳嗣子不敢上同皇祖紀元六十一載之數茲天恩申錫慶週甲子壽躋八旬開五十全紀續五代同堂實爲史冊罕觀用是諏吉立皇十五子嘉親王爲皇太子以明年爲嗣皇帝嘉慶元年用昭

付託至朕仰承昊眷康強逢吉一日不至倦勤即一日不敢懈弛歸政後凡遇軍國大事及用人行政諸大端仍當躬親指訓嗣皇帝知所秉承所有冊立皇太子典禮一切虛文俱不舉行其明年歸政一切典禮儀注著會同條議以聞

續典一

### 冊立皇太子儀

乾隆六十年九月詔我朝太祖太宗世祖俱未豫立儲位聖祖仁皇帝曾以嫡立理密親王爲皇太子後竟不克祇承訓諭特頒不復冊立迨傳位皇考雍正元年即親書朕名貯於乾清宮正大光明扁額之上朕踐阼以皇次子爲孝賢皇后所生曾書其名貯於正大光明扁上不意早年無祿會同大臣啓緘閱看贈端慧皇太子嗣於癸巳冬至南郊大祀敬以所定嗣位皇子之名禱於上帝

又於盛京恭謁祖陵時敬告太祖太宗在天之鑾是朕雖不明立儲嗣實早爲  
籌定朕誕膺大寶今六十年矣當傳位嗣子用是諏吉御門理事召皇子皇孫  
王公大臣等將癸巳年所定密緘嗣位皇子之名公同閱看立皇十五子某某  
爲皇太子等因當宣示冊立並下廷議冊立後儀制典禮 續典一 續典十一  
軍機大臣遵議皇太子應定儀制一乘用車轎俱用金黃色一皇太子行走  
諸皇子前坐次皇太子正坐諸皇子坐旁凡遇令節慶日諸皇子於皇太子前  
行三叩禮一宗室貝勒貝子公等遇皇太子慶日及令節行六叩禮一皇太子  
福晉應請旨立爲皇太子妃一皇太子移居毓慶宮一會典內載皇太子禮服  
用秋黃色現奉諭旨俱用金黃一會典內載有皇太子儀仗現遵諭旨冊立典  
禮既未舉行毋庸製備擬皇太子出入於例隨散秩大臣一員侍衛十員外添



派領侍衛內大臣一員侍衛四員前設虎槍三對後設豹尾槍八桿並令步軍統領衙門飭屬除避一皇太子千秋節御惇本殿受賀 續典十一

### 傳位大典籌備條款

乾隆六十年十月軍機大臣等議奏丙辰年舉行傳位大典應行籌備事宜開列條款一頒登傳位詔書鈐用太上皇帝之寶次用皇帝之寶一太上皇帝諭旨稱爲勅旨一太上皇帝起居注嗣皇帝起居注敬謹分纂一太上皇帝慶節稱萬萬壽嗣皇帝稱萬壽一太上皇帝嗣皇帝慶節令辰內外大臣恭遞慶賀請安摺俱繕備二分呈進其各部院及各省題奏事件俱照常式恭繕皇上睿鑒字樣後書嘉慶年號不必繕備二分一陛見文武大員及新授道府以上具摺恭請太上皇帝恩訓嗣皇帝恩訓一丙辰元旦奉先殿堂子行禮在未傳位

以前皇太子隨皇上行禮 續典二

授受儀

禮部奏進丙辰年正月初一日太上皇帝御太和殿親授寶璽嗣皇帝受寶禮成御太和殿登極頒發傳位詔書各儀注

丙辰元旦鑾儀衛陳鹵簿於太和殿前步輦於太和門外五輅及馴象仗馬黃蓋雲盤於午門外樂部設中和韶樂於太和殿簷下丹陛大樂於太和門內導迎樂及龍亭香亭於午門外太和殿檻內正中設皇太子拜褥內閣學士奉傳位詔安於東楹案上禮部官陳傳位賀表於西楹案上大學士二人分立左右殿檐下王以下文武百官朝服咸集朝鮮安南暹羅廊爾喀各國使臣列於班末欽天監官於乾清門報時禮部堂官奏請皇上禮服乘輿出宮皇太子從至

中和殿皇上升座皇太子在殿內西向立鴻臚寺官引執事大臣官員行禮奏樂皇上御太和殿升座禮部堂官導引皇太子詣正中拜位立奏樂鴻臚寺官排班引王公在丹陛上文武百官暨外藩各國使臣在丹墀下立鳴贊官進跪皇太子率王公以下皆跪贊宣慶賀傳位表大學士二人左右展表宣訖贊興大學士二人恭導皇太子近御座前跪左旁大學士請寶跪奉皇上親授皇太子皇太子跪受右旁大學士接奉設御座右几上大學士導引嗣皇帝仍詣拜位率王以下行九叩禮禮成太上皇帝啓座乘輿還皇宮帝於保和殿東暖閣更服皇帝禮服至中和殿執事大臣官員行禮皇帝御太和殿登極奏樂贊宣慶賀登極表宣讀如前王公以下暨外藩各國使臣行九叩禮大學士奉詔出殿中門授禮部堂官由中階下至丹墀陳於雲盤內禮部官跪受興由中道出

禮成皇帝啓座乘輿還宮大學士內閣學士詣乾清門送寶禮部恭鑄傳位詔書頒行天下 續典三

齋戒

皇帝壇廟祭祀太常寺先期奏請得旨親詣行禮乃請致齋南北郊及常雩祈穀俱於祭前齋三日御齋宮宗廟社稷齋三日羣祀齋二日並於養心殿凡齋之日躬懸齋戒牌尙膳不進葷法司不奏刑名辦事召見如常太常寺進齋戒牌銅人設黃案於乾清門中門之左右宮內各懸齋戒木牌於簾額齋畢並徹

典一

按順治八年定齋戒條大祀三日中祀二日凡陪祀致齋各官不理刑名不宴會不聽音樂不入內寢不問疾弔喪不飲酒茹葷不祭神不掃墓其

有疾者皆勿與若小祀則不進齋戒牌各衙門不致齋

### 閱祝版

定制皇帝親舉大享例以祝版陳詞時祭之文具有常式遇特祭則史官因事虔撰恭書御名祭之日奉常官爛奏讀者讀之書用清文讀用國語每祀前一日皇帝御殿祇閱焉祝版之制以木爲之方一尺五寸至一尺一寸各有定式天壇青紙朱書地壇黃紙黑書太廟社稷壇白紙黑書日壇朱紙朱書月壇及羣祀均白紙黑書太常寺標送內閣書祝辭大學士敬填御名陳候祇請閱視閱版之禮圜丘祁穀常雩御太和殿閱視方澤太廟社稷御中和殿閱視太常寺官自內閣奉祝版至殿並玉帛香以次陳於黃案皇帝詣案前立次第恭閱畢行一跪三拜禮太常寺官奉祝版玉帛香依次設香亭內皇帝上香行

禮鑾儀衛昇亭由中道出送祭所 續典二十二

坤寧宮祀神

每歲元旦神位前上香皇帝皇后行禮 正月初旬暨每月朔日朝祀之禮黃幔懸神像於殿西炕上陳果糕酒進二豕於庭司香獻香司祝獻酒執神刀致辭內監奏神絃拍板拊掌應節皇帝行禮司祝酌酒灌豕耳司俎舉豕於俎如法剖牲熟而薦之三獻畢乃徹饌列胙於長案皇帝陞南炕進胙肉召王公大臣入賜坐同食肉皇后則於東暖閣率貴妃以下分嘗 夕祀之禮青幔懸殿北炕上司祝束腰鈴擊手鼓迎神掩燈火闔戶振神鈴啓扉明燈餘同朝祀翌日行還愿禮設案於庭內神杆東北皇帝向神杆行禮司祝如法薦牲奉頸骨於杆端置膽膾於杆盃內以肉飯進帝后受胙餘同 每歲四孟月大祭並

同惟增陳馬牛各二於坤寧宮門外 每歲春秋二季奉神位於堂子大祭回宮並祭如前 每歲十二月二十六日昇神位至堂子饗殿內供奉至新正月初二日迎還 四月八日佛誕奉神位至堂子浴佛祭祀迎還 典二

乾隆四十五年諭重譯滿洲祭天祭神典禮依據清文詳加推繹坤寧宮所朝祭者爲佛爲聖帝夕祭者爲穆哩罕諸神祝辭內所稱納丹岱琿爲七星之祀喀屯諾延即蒙古神以先世有功而祀者其樹柳枝求福之神稱爲佛立佛多鄂謨錫瑪瑪知爲保嬰而祀者也 續典二十

按續編補輯祝辭贊辭暨求福諸儀有朝祭夕祭誦神歌灌牲供肉坐杌搖神鈴腰鈴背燈及祭之翼日祭天祝贊祈禱各辭其祝辭略稱上天之子佛及菩薩大君先師三軍之帥關聖帝君又年錫之神云云

求福祀神

求福之祭，詠吉定期，安樹柳枝於坤寧宮廊下，神幔懸像如朝祭儀。炕上陳豆糕等，皆以九數立神箭於炕前，預向滿洲九家攢取棉線綢片，捻爲索以練麻。繫神箭上外，由戶穿繫於柳枝。皇帝皇后親詣行禮，司祝舉箭奉練麻於帝后三掙而懷之，復以神箭所繫線索奉帝后升坐西炕，進福胙灑酒於柳枝所陳之糕夾於柳枝間。禮畢還宮，其夕祭求福帝后行禮如夕祭儀，而將柳枝所繫線索貯於囊，懸西壁上，送柳枝於堂子。至除夕，同神杆淨紙化之。

續典二十

按續編有樹柳枝爲嬰孩求福禱辭，略云佛立佛多鄂謨錫瑪瑪之神福。我某年生小子云云爲某人求福，則呼其人本生年並誦神歌。

奉先殿饗祀



奉先殿饗祀之禮日獻食月薦新朔望朝謁時節展拜出入啓告遇列聖誕忌辰及諸令節則於後殿上香行禮遇萬壽元旦冬至及國有大慶則奉神位於前殿祭饗凡上徽號冊立冊封御經筵耕藉田謁陵巡狩回鑾及諸慶典均祇告於後殿 典二

按續編順治十四年建奉先殿歲時特饗內務府掌儀司領其事是爲天子家廟之祭

### 壽皇殿饗恭

乾隆十五年壽皇殿成安奉列聖御容大祭皇帝親詣行禮定議每歲元旦恭懸列聖列后御容皇帝詣堂子奉先殿行禮畢詣壽皇殿行禮除夕初二日俱令皇子輪班行禮上元節每日供餅餌歲秋季展聖容祭如常儀 典二

按續編雍正年始於景山建壽皇殿奉聖祖神御乾隆初奉世宗神御至十四年乃移建於山向正中太祖太宗世祖暨列后向有御容藏體仁閣次年始合請於壽皇殿序依昭穆按室恭懸以時朝獻蓋準廟祫之儀殿龕供奉

嘉慶元年敕旨雍正年於養心殿東佛堂佛龕供奉聖祖帝后神位原以朝享歲有常期而宮闈近地可以朝夕頂禮此係皇考不匱孝照之所創設是以朕即添供世宗帝后神牌現在西配殿照東佛堂一律造龕將來萬萬年後朕及子孫皆可依次安設神牌壽皇殿養心殿供奉聖容神位皆皇考遺制所有圓明園安佑宮熱河永佑寺均當照此一律供奉以昭法守

續典三十九

令節設供

凡遇萬壽及元旦令節宮殿監設供案於天香亭奉神牌香燭祭品請皇帝拈香行禮仲春之朔祭日仲秋之望祭月七月七夕祭牛女並請后妃行禮

典二

令節設醮

每遇年節天穹寶殿欽安殿各設道場拜進表文 典二

天一門斗香

每歲元旦於欽安殿天一門設斗香候皇帝拈香行禮每月朔望俱設斗香宮殿監等行禮 典二

祀竈

每歲季冬二十三日坤寧宮祀竈皇帝詣佛前神前竈神前拈香行禮禮畢皇

后行禮送竈回宮 典二

按續編乾隆乙卯御製祀竈詩注祀竈古無明文天子不親五祀故皇祖從未舉行皇考乃定祀竈日於坤寧宮祀神並至竈神前致叩予謹遵弗忽至祀竈必於坤寧宮則以宮內北炕向設鐵鍋關東舊俗別無厨竈也先蠶壇饗祀及皇后躬桑

歲季春吉己皇后親饗先蠶施黃幄於壇上設神座於幄內蠶宮令詣神庫恭請先蠶西陵氏神位入壇安奉皇后行禮皇貴妃以下隨行禮進福胙福酒送神望瘞禮成退蠶宮令請神位復御 典二

又皇后躬桑西苑設觀桑臺臺下桑畦東西首行第一株爲皇后躬桑位以次爲妃嬪公主福晉命婦從桑位皇后右持鈎左持筐東行桑畦外采旂招颺內

監鳴金鼓歌採桑辭皇后採桑蠶母二人助採採畢歌止皇后御觀桑臺妃嬪以下各採畢引蠶母蠶婦至臺前跪受筐奉至蠶室以葉灑箔禮畢及蠶成蠶母獻繭乃擇吉皇后行纁三盆手禮妃嬪從纁 典二

交泰殿二十五寶

御定交泰殿二十五寶大清受命之寶以章皇序皇帝奉命之寶以章奉若大清嗣天子寶以章繼繩皇帝之寶以布詔赦右四寶皆開國貽珍其皇帝之寶傳自太宗時本用清篆又皇帝之寶以肅法駕天子之寶以祀百神皇帝尊親之寶以薦徽號皇帝親親之寶以展宗盟皇帝行寶以頒賜賚皇帝信寶以徵戎伍天子行寶以冊外蠻天子信寶以命殊方敬天勤民之寶以飭覲吏制誥之寶以諭臣僚敕命之寶以鈐誥敕垂訓之寶以揚國憲命德之寶以獎忠良

欽文之寶以重文教表章經史之寶以崇古訓巡狩天下之寶以從省方討罪安民之寶以張征伐制馭六師之寶以整戎行敕正萬邦之寶以誥外國敕正萬民之寶以誥四方廣運之寶以謹封識右寶二十有一乾隆十三年改鐫左清篆右漢篆並貯交泰殿其國初行用諸寶齋藏盛京鳳凰樓別爲寶譜

續典十七

高宗御用寶

一曰敬天勤民御製詩有序云皇祖鈐用諸璽皇考製箱藏之惟留是寶於外以鈐御書予亦常鈐用焉一曰信天主人一曰古稀天子之寶一曰五福五代堂古稀天子寶一曰八徵耄念之寶一曰十全老人之寶一曰太上皇帝之寶並御製有記有詩 續典十八

御寶開封并請用

每歲正月擇吉宮殿監率交泰殿首領太監等設案陳寶開封皇帝拈香行禮歲暮擇日陳寶案上內閣學士率典籍等洗拭貯匣封寶 皇帝巡幸啓鑿之日內閣學士率典籍請寶馳送駐蹕行宮交總管太監收入至回鑾日學士等領出捧交乾清門宮殿監率交泰殿首領太監捧安原處 凡一應誥勅用寶內閣列件具奏內閣學士會同總管內務府大臣詣乾清門左設案請寶驗同押用訖宮殿監等捧貯原處 典四

冊寶

冊尊皇太后冊寶金冊十頁高七寸一分廣三寸二分每頁金十有八兩聯以樞鈕面龍文金寶方四寸四分交龍鈕乾隆三十四年諭近檢體仁閣尊藏法

物孝莊文皇后玉冊玉寶俱存乃知冊寶有刻玉之制嘉玉較視良金尤爲寶貴越歲聖母八旬恭加徽號所奉冊寶宜極珍崇嗣定恭進玉冊玉寶

續典十九

冊立皇后金冊金寶制與皇太后同惟寶用蹲龍鈕 續典十九

冊封皇貴妃金冊頁重十有五兩金寶方四寸貴妃同 妃冊印金冊頁重十有兩八錢金印方三寸龜鈕 嬪冊金冊四頁 續典十九

各宮位號

皇帝尊聖祖母爲太皇太后聖母爲皇太后居慈寧壽康寧壽等宮奉太妃太嬪等位隨居皇后居中宮皇貴妃一位貴妃二位妃四位嬪六位分居東西十二宮 二宮貴人常在答應俱無定位隨居十二宮 典四



皇太后宮問安

皇帝每間二三日常服至皇太后宮跪問起居賜坐興一叩坐賜茶叩受飲奏對畢辭出 典一

恭進實錄聖訓

每遇恭進實錄聖訓安奉乾清宮暖閣俟皇帝前朝畢請詣行禮 典四

賞賜福字

每歲十二月初一日皇帝以賜福蒼生筆書福字懸貼各宮自是將軍督撫奏函至有旨特賜者並御書緘賜之十五六等日召御前大臣侍衛至重華宮二十六七等日召諸王大臣內廷翰林等至乾清宮賜福字皇帝親書福龍箋每書一幅王公大臣等一人進至御案前跪書畢叩首祇領興太監二人恭捧前

行隨而出依次跪領如儀 典一

按續編內殿寶藏先朝御用賜福蒼生筆康熙間偶書福字頒賜臣工至  
雍正年遂著爲恩例

進時憲書

每歲十月朔欽天監進時憲書由乾清門中門進至御前候皇帝御覽畢交懋  
勤殿收貯進皇后時憲書安交泰殿其皇貴妃等時憲書各進本宮 典四

按續編嘉慶初元懇進乾隆六十一年時憲書頒賞內廷其分頒各省外  
藩仍用嘉慶元年時憲書自是至四年皆如之

進春

每歲立春順天府例進春先期推歲干支及立春日時爲春圖飾土牛芒神作

春山各爲一案具春座至期奉至乾清門進陳乾清宮西暖閣皇帝御覽畢臬貯太和殿東暖閣將舊歲所進舉出其進皇后宮春座陳交泰殿臬貯保和殿東暖閣 典四

進春帖子

每歲立春南書房翰林等進春帖子交懋勤殿呈御覽後陳設乾清宮西暖閣溫室案上將舊詞換出仍頒賜諸翰林福字箋暨筆墨箋紙等物 典四

萬壽燈聯

每年十二月二十四日乾清宮丹陛上安設萬壽燈二座左右各懸萬壽寶聯十六幅丹陛下安設天燈二座自此日爲始每晚上燈至二月初三日出燈之日止至除夕並安設兩廊暨甬道石欄上燈是夕暨元旦正月十一十四五六

等日俱上燈至十八日出燈 典四

同日皇極殿上燈如例續典四十一

按續編乾清宮萬壽燈聯十六幅傳自前明藉存殷鑑皇極殿燈聯乾隆  
年敕翰臣撰進

張掛春聯門神

每歲十二月二十六日張掛春聯門神外朝三大殿等處工部內務府員役張  
掛其內廷自乾清門乾清宮以及各門各宮等處由宮殿監傳營造司首領太  
監翬進張掛次年二月初三日收下交門神庫收貯 典四

張掛宮訓圖

每歲張掛春聯之日宮殿監傳知十二宮首領將欽定宮訓圖張掛景仁宮燕

姑夢蘭圖承乾宮徐妃直諫圖鍾粹宮許后奉案圖延禧宮曹后重農圖永和宮樊姬諫獵圖景陽宮馬后練衣圖永壽宮班姬辭輦圖翊坤宮昭容評詩圖儲秀宮西陵教蠶圖啓祥宮姜后脫簪圖長春宮太妃誨子圖咸福宮婕妤當熊圖次年二月仍行收貯 典四

懸掛春屏綵勝

每歲立春日各宮殿懸掛春屏綵勝二月初三日徹收 典四

懸掛椒屏歲軸

每歲十二月造辦處製椒屏四懋勤殿翰林擬吉語標題恭頌於左方並豫擬歲軸十聯交畫院恭繪俱由懋勤殿進呈御覽後交養心殿等處懸貼 典四

尊藏先朝法物

高宗御識盛珠盒一盛福炸器一貯火鑱漆盒一菩提朝珠一木椀一脂玉念珠一明黃馬尾鞵帶一續經一

按續編原按高宗尊藏先朝法物不啻此數僅就有識語者書之即重華宮櫃所藏聖祖世宗賜物之可記者也至孝聖憲皇后賜物高宗潛邸常用服物孝賢純皇后嘉禮時裝奩並貯宮櫃又如列聖所御冠服朝珠貯端凝殿定爲二十五層之匣高宗御用冠袍帶履並貯殿中又孝賢純皇后東珠頂冠東珠朝珠等物藏長春宮諭賜世代皇后服用此皆不僅爲鋪宮陳設誌者也

皇子就傅

皇子屆六齡入學詣尙書房至聖先師神位行禮見總師傅師傅行對揖禮就

坐讀書平時相見握手致敬每晨授讀總師傅以時稽察課程凡皇孫皇曾孫  
皇元孫入學同 續典三十九

加恩幼侍

皇子生設乳母侍母承侍內宮按年月日給與分例有加賞者出自特恩至承  
侍之皇子即皇帝位其乳母例邀封贈其子嗣例邀世職產業之賜侍母無封  
贈世職仍一體邀賞 續典三十九

嘉慶三年敕旨皇帝之乳母侍母等應一體加恩著照乾隆元年例將皇帝三  
次乳母撰擬封贈其子嗣等俱賞給騎都尉世職仍酌賞房屋居住並各賞銀  
一千兩安置產業其侍母等亦各賞房屋一所銀一千兩 續典三十九

按乳母例封某某夫人各擬應封字樣候旨點定沿明代奉聖例也

選看秀女

凡三年一次引選八旂秀女由戶部奏請於神武門外豫備宮殿監率各該處首領太監關防以次引看 凡一年一次引選內務府所屬秀女由內務府奏請引看例同 典四

宮女額數

皇太后宮宮女十二名皇后宮十名皇貴妃貴妃位下各八名妃嬪位下各六名貴人位下四名常在位下三名答應位下二名 典四

按順治十五年十一月禮部等會議宮闈女官名數品級及供事宮女名數乾清宮設夫人一位秩一品淑儀一人秩二品婉侍六人秩三品柔婉二十人芳婉三十人俱秩四品尙宮局尙宮司紀司言司簿各二人司闈



四人女史六人尙儀局尙儀一人司樂二人司籍司賓司贊各四人女史  
三人尙服局尙服一人司仗四人司寶司衣司飾女史各二人尙食局尙  
食一人司饌四人司醞司藥司供女史各二人尙寢局尙寢一人司設司  
燈各四人司輿司苑女史各二人尙績局尙績一人司製四人司珍司彩  
司計女史各二人宮正司宮正女史各二人俱秩六品慈寧宮設貞容一  
人秩二品愼容一人秩三品勤侍無品級

### 宮內規則

一內庭位次各有差等非本宮太監女子不可擅行使令 一皇帝駕臨內宮  
本宮居住之內庭等位咸於本宮門外迎送若皇后駕臨亦如之 一內庭等  
位遇娠有生母者許進內照看宮殿監奏派總管太監率敬事房及御藥房太

監等上夜 一皇子誕生由宗人府奏請賜名交內閣擬呈候欽定載入玉牒  
皇子公主係內庭某位所生及年月日時並載入 一皇太后皇后皇貴妃貴  
妃嬪嬪之父母姓名官位遇修玉牒奏明載入 一內庭等位父母年老奉特  
旨許入宮會親其餘外戚不許隨入 一各宮太監奉主位命往外家慰問不  
許傳宣內外一切事情 一凡已出宮女子不許復進亦不許差人至宮門與  
本主請安 一凡宮女不許與太監等認爲親戚非奉本主使令不許擅相交  
語並嘻笑喧譁 一凡太監行路或過各宮女子皆讓女子走過再行不許攙  
雜爭路 典四

宮中門禁

一合符 塗金鐫陽文聖旨字藏大內於景運隆宗東華西華神武門豫頌陰

文合符如遇夜有奉旨啓門者比驗乃啓又步軍統領衙門及正陽西直二門頒給陰文合符同遇應啓門時比驗立放其餘各門馳報步軍統領比驗啓放均於次日具奏

一宿衛 三旗侍衛分內外班直乾清門三大殿八旗前鋒營護軍營守衛內外各門按日分班輪番直宿又防範火班遇時調集總隸於景運門直班統領一傳籌 紫禁城內五籌遞傳每夕自景運門發籌凡十二汎爲一周仍至景運門紫禁城外每夕八籌遞傳自闕左門起訖

一門鑰 恭遇皇帝乘輿出入均啓中門各門每夕司鑰長率遣軍官驗視局鑄納鑰彙存詰朝各門校領鑰以次啓門日以爲常

一禁令 紫禁城內各門凡王公官員執事人等各有限制不得擅行其准禁

門行者均登門籍工役人等各給腰牌出入稽驗又每門設紅杖二以護軍執坐門下有不報名擅入者撻之 續典四十二

宮殿事宜

一乾清宮等處三年一修由宮殿監奏交內務府擇吉修理 一春季換戴涼帽之日各宮門俱換竹簾秋季換戴暖帽之日各宮門俱換氈簾工部內務府司其事 一每年三月宮內等處淘溝內務府擇吉營造司進辦 一每年四月修魚池換新水出葡萄引蔓架上九月培藏俱由奉宸苑督役 一宮殿庭院設有貯水大銅鐵缸小雪節安蓋酌量氣候用火融水驚蟄節徹蓋滿貯清水 一乾清宮等安設激桶每月二十五日查看修理 一每年冬季各宮殿寶座炕氈查看酌量應否更換知會武備院督役鋪設 一每年冬季各宮殿

糊窓由內管領理事關防處擇吉查看酌量糊飾 一各宮坐更處小雪節安設氈棚驚蟄節徹去 一每年十二月各宮殿掃塵由內管領處擇吉奏聞進役洒掃 典四

冠服

皇太后薰貂朝冠青絨朝冠金約珥領約朝珠綵悅綿緞有褶朝褂綿緞朝褂紗朝褂黃貂皮緣緞朝袍海龍皮緣緞朝袍綿緞朝袍紗朝袍海龍皮緣灰鼠皮裏緞朝裙綿緞朝裙紗朝裙薰貂吉服冠青絨吉服冠吉服褂吉服袍皇后皇貴妃貴妃妃嬪同惟皇太后皇后皇貴妃袍並用明黃色貴妃妃並用金黃色嬪用香色皇子福晉側晉並用香色 典五

儀駕

皇太后儀駕鳳轎鳳輿各一儀轎儀輿各二均黃髮朱鬘金提鑪金香合金瓶各二金洗金水盂各一金交椅金方几各一明黃緞繡九鳳三幃曲蓋一金節二青黃紅白黑緞繡九鳳繖各二黃緞繡寶相花繖紅緞方繖各四黃紅緞繡龍鳳扇各四黃紅羅繡雉羽扇各四青黃紅白黑雲緞金龍鳳旂各二臥瓜立瓜吾仗各四皇后儀駕同鳳轎並舁以十六人皇貴妃貴妃儀仗翟轎翟輿各一金黃髮轎舁以八人金黃曲蓋餘亦減妃嬪采仗以次減嬪紅緞曲蓋凡儀駕旂繖頂俱以金儀仗采仗俱塗金擎執輿尉俱用旂尉內廷陳設則用內監服紅繡衣繫綠紬帶戴青氎帽紅纓金頂插金黃翎

典五

按續編皇太后儀駕用龍鳳輿龍鳳車各一又乾隆十六年皇太后六旬萬壽上奉慈駕入宮皇太后御金輦明黃緞緯繡壽字篆文名爲萬壽輦

# 宮殿

## 外朝

宮殿制度自外朝以達內廷多仍明舊乾清門以內並東西各宮殿曰內廷乾清門外自保和殿以南曰外朝宮史以宮殿起名規制具詳若壽皇殿雍和宮瞻禮之所暨西苑臨御諸處皆恭載焉 宮一續宮一

## 皇城

皇朝宮殿居都城正中環以皇城周十八里有奇廣袤三千六百五十六丈五尺城四門南曰天安北曰地安東曰東安西曰西安天安門外東西南三面垣周四百七十一丈三尺六寸正南曰大清門東爲長安左門西爲長安右門又

增築外垣各設三座門此皇城外郭之制也 宮一續宮一

紫禁城

紫禁城居皇城内周六里廣袤一千六十八丈三尺二寸城四門南曰午門北曰神武東曰東華西曰西華四隅角樓各一牆外東西北三面守衛圍房七百三十二間此紫禁城內維之制也 宮一續宮一

御河

皇城内河流環繞由地安門外西步梁橋入者經景山西門引入環紫禁城是爲護城河護城河西面之水自城西南隅流經天安門外金水橋東南注御河是爲外金水河又西闕門下有地道引城河經午門前至東闕門外循太廟右垣南流折而東注太廟戟門外甯子河東南合御河其由地安門東步梁橋入



者經東安門望恩橋注御河其入紫禁城者由神武門西地道引護城河水流入沿西一帶經武英殿太和門前是爲內金水河復流經文淵閣前至三座門從鑾駕庫巽方出紫禁城此皇城內外水道經由之次也 續宮一

### 大清門

大清門在正陽門內皇城之第一門也前爲天街周以石欄俗名碁盤街門內千步廊左右朝房東西向者各一百十楹北向者各三十三楹凡吏兵二部月選官掣籤刑部秋審禮部鄉會試磨勘俱於此朝房之外東爲戶部米倉西爲工部木倉其北天街橫互東出爲長安左門西出爲長安右門趨朝者由此出入其北爲天安門 宮一續宮一

### 天安門

天安門即皇城南門也初名承天門爲門五上覆崇樓九楹國家有大慶典覃恩於樓上宣詔設金鳳銜而下焉其北相直爲端門 宮一

太廟

太廟在端門東前殿十一楹中殿九楹同堂異室內奉列聖列后神龕後殿制如中殿奉祧廟神龕前殿東廡爲配饗功王位西廡爲配饗功臣位正南門外橋五座橋下向無水乾隆年始引金水橋水注之 宮一 續宮一

按順治元年燕京立太廟尊盛京太廟爲四祖廟

社稷壇

社稷壇在端門西壇北向制二成高四尺第一成方五丈次成方五丈三尺陞四出各四級上成用五色土隨方築之墻垣四面開櫺星門繚垣土色亦各以

其方壇北爲拜殿 宮一

### 端門

端門之內左右爲六部九卿朝房餘爲吏科戶科禮科公署在東中書科兵科刑科工科公署在西吏科之北敬安石刻聖祖御製臺省銘又北東出者爲闕左門西出者爲闕右門凡九卿會議揀選人員驗看月官俱集左門下八旂都統會議俱集右門下門北爲諸王朝房 宮一

### 午門

午門爲紫禁城南門上覆崇樓五即俗所謂五鳳樓也國家有所征討凱旋獻俘皇帝御午門行受俘禮午門之前凡頒朔宣旨及百官常朝俱集於此午門爲門三文武官出入皆由左其右門惟宗室王公得行之兩觀門左右掖門不

常啓惟大朝陞殿百官各以東西班次由掖門入殿試文武進士鴻臚寺按中式名次引入一名由左二名由右餘仿此 宮一

按明時朝房俱在午門外清初始移於乾清門左右景運隆宗二門外因常朝在乾清宮也

### 太和門

太和門在午門北左爲昭德門右爲貞度門金水橋五座玉河環繞東協和門西熙和門東廡爲稽查欽奉上諭事件處及內閣誥勅房西廡爲繕書房及起居注公署東南隅爲內閣西南隅爲國史館 宮一

按清初御門之典在太和門後改御乾清門

### 太和殿

太和殿正殿也每歲元旦冬至萬壽三大節及國家有大慶典御殿受賀凡大朝會燕饗命將出師臨軒策士及百僚除授謝恩皆御焉前爲露臺列龜鶴彝器各二日晷嘉量各一龍墀三重丹陛五出下重陛級二十三中上二重級各九上下列寶鼎十有八左爲中左門右爲中右門其東出者左翼門西出者右翼門翼門之南左爲體仁閣右爲弘義閣庭中甬道左右設品級銅山自正一品至從九品各十八爲文武官員行禮班位 宮一

### 中和殿

中和殿凡遇三大節皇帝先於此陞座內閣內大臣禮部都察院翰林院詹事府堂官及侍衛執事人員行禮畢然後出御太和殿 宮一

### 保和殿

保和殿每歲除夕皇帝御殿筵宴外藩每科策試朝考新進士入殿左右列試殿之左門曰後左門右門曰後右門殿後即乾清門 宮一續宮三

文華殿

文華殿在協和門之東每歲春秋仲月皇帝御經筵講臣於殿內進講東廡曰本仁殿西廡曰集義殿後殿爲主敬殿殿後爲文淵閣 宮一續宮三

文淵閣

文淵閣乾隆三十九年建藏四庫全書凡三萬六千冊每歲經筵禮成講臣隨駕至閣賜坐賜茶詣本仁殿入宴 續宮三

傳心殿

傳心殿在文華殿東中祀皇師帝師王師先聖先師每逢月朔太常寺堂官詣

殿拈香凡經筵之日命大學士祭告乾隆六年皇帝御經筵特旨親詣行禮六十年親祭如初嘉慶元年承勅旨親詣行禮殿之前爲景行門 宮一續宮三

### 三所

三所在文華殿東稍北凡大內俱黃琉璃瓦惟此用綠爲皇子所居其前爲王公文武大臣輪班宿衛直房東爲御藥房西爲蒙古朝房南爲鑾駕庫石碣刻古今通集庫五字東南爲國史館 宮一續宮三

按中所是爲擷芳殿爲仁宗潛邸乾隆六十年乙卯始移居

### 武英殿

武英殿在熙和門之西門前御河環繞石橋三殿前後二重皆貯書籍凡欽定命刊諸書俱於殿左右直房校刻裝潢東北爲恒壽齋西北爲浴德堂皆詞臣

校書直次殿西爲尙衣監其後殿宇二重亦爲皇子所居殿北爲方略館又北爲回子學緬子學 宮一續宮三

內務府

內務府公署在武英殿北以總管內務府大臣統之掌宮內一切事務奉宸院武備院上駟院並隸焉所屬廣儲會計掌儀都虞慎刑營造慶豐七司等秩釐然一掃明代內官監之弊順治年勅設 續宮三

咸安宮

咸安宮在武英殿西有官學爲教習內府三旗及滿洲八旗大臣子弟肄業處以翰詹官督課之 續宮三

南薰殿



南薰殿在咸安宮西乾隆十四年詔以內府所藏歷代帝后圖像尊藏於此帝后圖像爲軸者六十有八爲冊者七爲卷者三先聖名賢圖冊五又明諸帝王冊原貯工部外庫並附藏殿之西室 殿西爲御書處凡御書法帖皆於此鐫刻 宮一續宮三

### 內廷

內宮之制乾清坤寧法象天地爲紫微正中與盛京清寧宮天然合一東西闢門象日月左右列永巷二每一永巷以次列三宮布爲十二辰其後東西分列五所而躔周星共之義備矣茲紀內廷諸制迥非往日所傳宮殿之簿禁編之書所能鋪張萬一謹從特書之例分著於編 續宮四

### 乾清門

乾清門皇帝御門聽政於中門陳設御座黼扆部院以次啓事內閣面承諭旨於此 宮二

乾清門中門三凡召對臣工引見庶僚俱由右門出入內廷行走之大臣官員亦得由之中門之旁左爲內左門右爲內右門凡內官及承應人等出入俱由內右門軍機大臣南書房翰林內務府大臣官員出入亦得由之內左門之東爲侍衛直宿房散秩大臣直宿房及文武大臣奏事待漏之所內右門之西爲侍衛房及軍機處內務府辦事處其南相對東爲宗室王公奏事待漏之所西爲軍機章京直舍 宮二

乾清門墀下東出者爲景運門西出者爲隆宗門 宮二

乾清宮

乾清宮皇帝臨軒聽政歲時於內廷受賀賜宴及常日召對臣工引見庶僚接  
覲外藩屬國陪臣皆御焉中懸世祖御書正大光明扁東暖閣曰抑齋西暖閣  
曰溫室丹陛下有文石臺二上安設社稷江山金殿 宮二 續宮四

乾清宮之左爲昭仁殿右爲弘德殿東廡爲御茶房爲端凝殿爲自鳴鐘處爲  
御藥房轉而南向北者爲上書房西廡爲懋勤殿爲批本處爲內奏事房轉而  
南向北者爲南書房爲敬事房 宮二

乾清宮東廡東出者爲日精門西廡西出者爲月華門昭仁殿之左東出者爲  
龍光門弘德殿之右西出者爲鳳彩門 宮二

按康熙以前皆以乾清宮爲寢殿乾隆以後始改御養心殿

昭仁殿

昭仁殿爲聖祖在御時日夕寢興之溫室也高宗敕藏貯宋元鐫本扁曰天祿  
琳瑯西室彙貯宋岳珂校刻五經扁曰五經萃室 宮二續宮四

弘德殿

弘德殿扁曰奉三無私皇帝傳膳辦事處也 宮二續宮四

端凝殿

端凝殿取端冕凝旒之義御用冠袍帶履俱貯於此其南即自鳴鐘處向貯藏  
香及西洋鐘表沿稱爲自鳴鐘實仍統於端凝殿列聖所御冠服朝珠尊藏於  
此 宮二續宮四

懋勤殿

懋勤殿聖祖曾讀書於此後爲內廷翰林兼直之所凡圖史翰墨之具皆貯焉

每歲秋讞時刑科覆奏本上皇帝御殿親閱招冊內閣大學士及刑部堂官面承諭旨於此 宮二

批本處

批本處凡內閣擬票本章俱經本處進呈御覽然後票寫清文交閣 宮二

內奏事房

內奏事房每日內外臣工所進奏章及呈遞膳牌由外奏事官接入於此交內奏事太監進呈得旨後仍由此交出 宮二 續宮四

敬事房

敬事房爲宮殿監等辦事處 宮二

交泰殿

交泰殿在乾清宮後制如中和御用寶璽二十有五尊藏於殿中殿之兩廡左出者爲景和門右出者爲隆福門 宮二

坤甯宮

坤寧宮在交泰殿後左爲東暖殿右爲西暖殿東出爲永祥門基化門西出爲增瑞門瑞則門宮後爲坤寧門門外即御花園也 宮二

御花園

御花園在坤寧宮後左曰瓊苑東門右曰瓊苑西門園中奇石嘉木有古柏藤蘿皆數百年物正中爲天一門門北爲欽安殿祀元天上帝其東稍北疊石爲崇山山之東爲摘藻堂堂前有池池南向西者爲絳雪軒多植海棠軒南即瓊苑東門也欽安殿之西稍北爲延暉閣閣前相對爲四神祠閣西爲位育齋齋

前有池池南爲養性齋有樓齋之南即瓊苑西門也欽安殿之後爲承光門爲順貞門再北相對爲神武門即紫禁城北門也 宮二

按絳雪軒海棠亦曰絳雪花即太平花

### 摘藻堂

摘藻堂內經史子集插架四周高宗敕錄四庫全書薈要排貯於此

### 宮二續宮五

### 東長街六宮

日精門之東爲東一長街南即內左門中爲近光左門北爲長康左門宮三曰景仁宮曰承乾宮曰鍾粹宮再東爲東二長街南則麟趾門北則千嬰門宮三曰延禧宮曰永和宮曰景陽宮再東爲小長街北有天穹寶殿祀昊天上帝東

二長街之北有殿宇五所謂乾東五所也 宮二

景陽宮後殿高宗扁曰學詩堂內府所藏宋高宗書毛詩及馬和之所繪圖彙貯於此 續宮五

乾東五所東二所仁宗潛邸會居是 續宮五

西長街六宮

月華門之西爲西一長街南即內右門中爲近光右門北爲長康右門宮三曰永壽宮曰翌坤宮曰儲秀宮再西爲西二長街南則螽斯門北則百子門宮三曰啓祥宮曰長春宮曰咸福宮北爲乾西五所 宮三

咸福宮嘉慶四年皇帝會居於是 續宮五

乾西五所其西二所高宗龍潛時舊邸也改建重華宮 續宮六



齋宮

齋宮在東長街之南雍正九年建凡南北郊及祈穀常雩大祀皇帝致齋於此

宮二

重華宮

重華宮即乾西五所之一高宗潛邸也乾隆年每新正常侍皇太后宴並與諸王及內廷大學士翰林等小宴聯句均有詩宮之前曰重華門門內爲崇敬殿扁曰樂善堂堂之後即重華宮東廡爲葆中殿扁曰古香齋西廡爲浴德殿扁曰抑齋重華宮後爲翠雲館東爲漱芳齋有靜憇軒爲高宗舊書室 宮三

按高宗重華宮記重華宮昔之西二所雍正年蒙賜居即位後升爲宮又樂善堂記昔樂善堂集中有樂善堂記蓋用此名以名圓明園賜居桃花

塢之堂祇數典漢東平今斯堂則爲重華宮之前殿大舜所謂樂取與人  
以爲善也又抑齋記向居重華宮名書室曰抑齋後於凡御園行館有可  
以凭几展卷者無不以是名之示不忘舊也

建福宮

建福宮乾隆七年建啓祥宮之西爲延慶殿殿後爲撫辰殿再後爲建福宮高  
宗嘗奉皇太后賞花侍膳有靜怡軒敬勝齋碧琳館三友軒延春閣

宮三續宮六

養心殿

養心殿皇帝宵旰寢興之所也凡辦理庶政召對引見一如乾清宮殿壁懸天  
下缺分繁簡單各省文武官名單東室爲寢宮西室扁曰三希堂有長春書屋

無倦齋樂天閣前爲御膳房 宮三 續宮七

三希堂藏王羲之快雪帖王獻之中秋帖王珣伯達帖高宗有御記 宮三

### 奉先殿

奉先殿在景運門東順治年建凡朔望薦新歲時展禮及冊封諸大典先期告祭內務府掌儀司供其事 宮三

### 慈寧宮

慈寧宮在隆宗門之西順治十年建南爲長信門凡大朝賀門前陳設皇太后儀駕文武二品以上大臣俱於門外隨班行禮 宮三

慈寧宮向不施層檐乾隆年皇太后八旬晉祝始增加前殿重檐而遙新之爲正殿東廡有佛堂後殿供奉佛像右即御花園園中爲咸若館亦供佛

續宮八

慈寧宮東北爲雨華閣三層俱供西天梵像閣後有寶華殿中正殿梵宗樓皆供佛 宮三 續宮八

壽康宮

壽康宮在慈寧宮西皇太后起居之所也乾隆年尊奉聖母及崩後每遇聖誕令節及上元前日敬詣行禮 宮三 續宮八

壽安宮

壽安壽宮在康宮後本咸安宮舊址乾隆辛未爲皇太后萬壽改建祝釐前殿爲春禧殿正殿爲壽安宮左右延樓中庭崇臺三層其後疊石爲山東曰福宜齋西曰萱壽堂 宮三 續宮八

壽安宮北爲英華殿亦供佛像之所庭中有菩提樹七株殿西有城隍廟廟東爲祀馬神之所又東即神武門也 宮三 續宮八

### 寧壽宮

寧壽宮乾隆壬辰重建待歸政後備萬年尊養之所丙申落成奉皇太后稱慶是年金川奏凱並就階下賜成功將佐及近臣等食暨八旬開祝凡在宮廷受賀曲燕諸典時一臨蒞舉行迨丙辰元旦授璽禮成御皇極殿皇帝率天下萬國耆叟八千餘人晉祝萬萬壽爲古今鴻慶也

寧壽壽在紫禁左垣蒼震門東其制九重分中東西三路南北繚牆一百二十七丈有奇東西延亘三十六丈有奇門六正南皇極門左爲皇極左門右爲皇極右門門外東出者曰歛禧門西出者曰錫慶門皇極門內爲寧壽門前爲皇

極殿仿乾清宮制中爲寧壽宮後爲養性殿一如養心殿式爲倦勤後寢興之所西暖閣曰墨雲室藏畢沅進南唐李廷珪墨養性殿後爲樂壽堂制如長春園之淳化軒與萬壽山樂壽堂同樂壽堂後爲頤和軒軒後爲景祺閣是爲中路

寧壽宮東爲景福宮本聖祖奉孝惠皇太后所居也高宗重建扁曰五福五代堂院有山石曰小有洞天宮後爲梵華樓前爲閱是樓有佛日樓景祺閣文峯閣等是爲東路

寧壽宮西爲遂初堂前爲古華軒後爲萃賞樓樓北有山再北爲符望閣閣後爲倦勤齋有擷芳亭旭輝亭延趣樓養和精舍玉粹軒竹香館等是爲西路

## 毓慶宮

毓慶宮在齋宮之東爲諸皇子所居乾隆六十年仁宗受封皇太子賜居於是復賜額繼德堂東室爲味餘書屋再東爲知不足齋前殿爲惇本殿

### 宮二續宮十

按仁宗毓慶宮詩序宮係康熙年建爲皇太子所居雍乾間皇子六歲入學多居於此至成婚時始賜邸第予嗣位後蒙恩居此四年此後當留爲幾暇臨幸之處

## 壽皇殿

壽皇殿舊居景山東北乾隆十四年重建南臨景山中峯制仿太廟奉聖祖世宗御容並自體仁閣迎太祖太宗世祖列帝列后聖容尊藏殿內皇帝歲時瞻

禮於此嘉慶四年奉安高宗御容殿東爲永思殿又東爲觀德殿高宗梓宮先安殿內移奉裕陵 宮四 續宮十一

按續編神御殿之名昉自宋代猶漢原廟遺意壽皇殿實仿太廟而約之歲時內謁告虔著爲成憲蓋與奉先殿並重焉

又按實錄順治十八年奉移大行皇帝梓宮於壽皇殿歷代大事皆即殿中行禮

景山

景山周二里餘有峯五中高十一丈六尺左右各高七丈一尺次各高四丈五尺峯各有亭中曰萬春左曰觀妙曰周賞右曰輯芳曰富覽山之前爲北上門有綺望樓山後爲壽皇殿東爲護國忠義廟范關帝立馬像北上門左右長廡



爲教習內務府子弟讀書處 宮四

### 雍和宮

雍和宮在皇城東北世宗藩邸也登極後命名曰雍和宮乾隆年選梵僧司守前有天王殿中爲雍和宮後爲永佑殿殿後爲法輪殿再後爲萬福永康延綏三閣閣爲綏成殿原安世宗神御泊壽皇殿落成遂移奉焉西有戒壇仿熱河廣安寺壇式宮之東爲書院曰太和齋齋東有室曰五福堂齋西爲海棠院院西有樓爲斗壇曰祝齡宮之西後爲關帝廟前爲觀音殿 宮六 續宮十一

按續編我朝家法凡先皇臨御興居之所多尊爲佛地世宗肇封雍邸高宗復誕靈於是雍正初命升爲雍和宮乾隆年選僧崇奉每屆春正躬親展禮歲時車駕並常詣焉

西苑

西苑在西華門之西即太液池也源出玉泉山從德勝門水關達後湖流入苑匯爲巨池周廣數里瀛臺在其南闡福寺在其北萬善殿紫光閣東西對峙上跨長橋樹坊二曰金鰲曰玉竦橋北爲北海橋南爲中海瀛臺南爲南海中海有亭出水中曰水雲榭御書石碣曰太液秋風北海瓊島有石碣曰瓊島春陰皆燕山八景之一 宮四

按高宗南海詩注本一液池因間以苑橋俗遂稱北海中海南海

勤政殿

勤政殿在西苑中爲幸苑聽政之所臨池面北殿前向北正門曰德昌殿後面南曰仁曜門由仁曜門而南渡橋爲瀛臺 宮四 續宮十二

按高宗勤政殿記及詩注理事正殿皆顏勤政是地勤政殿爲皇祖御題  
圓明園爲皇考所書嗣是萬壽山香山及避暑山莊皆恪遵書額

### 瀛臺

瀛臺在勤政殿南平隄石欄歷級而登有閣北嚮曰翔鸞閣左右建樓迴抱東  
曰祥輝西曰瑞曜由閣而南爲涵元殿正中南向東爲慶雲殿西爲景星殿中  
有蓬壺殿東曰藻韻樓西曰綺思樓正北相對爲香宸殿東有室曰虛舟西有  
室曰水一方殿後爲瀛臺即趨臺舊址左右有樓東爲春明西爲湛虛中庭有  
木變石一株又南臨水爲迎薰亭自翔鸞閣至迎薰亭統名瀛臺其南即南海  
也 宮四續宮十二

按瀛臺順治年賜名高宗瀛臺詩注每冬太液冰堅命簡習冰嬉之技以

爲常例又香辰殿詩注香辰殿乃明時舊名予年十四五時讀書於此

補桐書屋

補桐書屋在瀛臺之東高宗讀書之所也庭有雙梧摧其一命補之因顏額而以舊桐斲爲四琴貯書屋中其東室曰隨安又折而東山徑間爲待月軒軒南有海神祠 宮四

寶月樓

寶月樓在瀛臺之南隔池相對南岸向無殿宇乾隆戊寅建有御製寶月樓記

宮四

按高宗寶月樓詩注寶月樓每歲春初偶一臨之墻外西安街移西域回部居之人稱回子營新建禮拜寺正與樓對

淑清院各景

由仁曜門而東沿隄過崑崙石渡橋而北爲淑清院院東北隔水有室曰葆光院左渡小橋舊有蓬瀛在望乾隆己卯以臨江進新獲周罇鐘十一枚易名韻古堂有曲澗浮花流杯亭素尙齋諸勝素尙齋東奇石修竹飛瀑下注曰千尺雪又東爲魚樂亭折而南爲日知閣閣據石梁下爲水閘太液池水從此出達於織女橋者也閣左爲春及軒爲交蘆館爲芸齋竹室室南爲蕉雨軒爲雲繪樓又南爲韻磬居爲清音閣有門曰印月門外則船塢也由清音閣沿堤而南有崇基二層爲同豫軒與寶月樓相望軒後複道歷級而上爲鑑古堂軒左右各有室曰香遠曰靜柯 宮五

按高宗同豫軒詩注軒在液池南岸紫光閣賜宴外藩每先臨此傳餐待

備

豐澤園

豐澤園爲皇帝歲舉藉田先期演耕於此西苑宮室皆因元明之舊惟園爲康熙間新建自勤政殿西行有小屋數楹爲聖祖養蠶處復西歷稻畦數畝折而北即園園後種桑十株入園門爲惇叙殿舊名崇雅乾隆壬戌秋宴王公宗室於此因易名殿後曰澄懷堂康熙初詞臣常於此進講北有樓曰遐矚西南隔水相對爲純一齋其西即春耦齋也春耦齋後爲聽鴻樓有植秀軒虛白室愛翠樓樓南有佛宇曰大圓鏡其東有石門門外爲荷風蕙露亭由亭循池西岸而南爲茂對齋建山上東與寶月樓相望其右有涵春室延賞亭

宮五

按高宗春耦齋詩注春耦以演耕得名唐韓滉五牛圖卷及明項聖謨臨

混本蔣廷錫臨聖謨本彙弄齋中

### 紫光閣

紫光閣聖祖時每於仲秋校射於此後於前殿試武進士循以爲例乾隆年平定伊犁回部圖功臣於閣上並藏得勝靈纛及俘獲軍器左壁平定伊犁等圖右壁平定回部等圖閣後新建武成殿北爲時應宮宮之東有門曰福華其外即金鰲玉竦也 宮五

按續編紫光閣基本明之平臺後改爲閣外藩賜宴自乾隆二十六年  
承光殿

承光殿即元時儀天殿之舊也在金鰲玉竦橋東有崇臺即臺址爲圓城俗名團城周數百步殿南有石亭以置元代玉甕殿後爲敬躋堂東爲古籟堂又東

爲朶雲亭餘清齋西爲沁香亭北駕石梁有牌坊二曰積翠曰堆雲過橋即永安寺也 宮五

萬善殿

萬善殿在蕉園中由西苑門循岸而北爲蕉園舊址折而西爲萬善殿正中扁曰敬佛殿後爲千聖殿其東迎祥館其西集瑞館萬善殿明舊名崇智乾隆庚寅重建由萬善門而西即液池秋風也 宮五 續宮十六

永安寺

永安寺爲金源瓊華島踞太液池中奇石疊累而成皆當時輦致艮嶽之遺也元時稱萬壽山亦稱萬歲山舊有廣寒殿相傳爲遼后梳粧臺順治八年立塔建寺俗稱白塔寺入門法輪殿左右有巨石東曰崑崙西曰嶽雲殿後爲正覺



殿普安殿石磴層躋而升爲善因殿中供梵銅佛像其後卽白塔也由塔東下至山足爲智珠殿有交翠亭看畫廊又東至山麓有石碣卽瓊島春陰也

### 宮六

#### 悅心殿慶霄樓琳光殿

悅心殿在永安寺西由寺西山麓躡級而上皇帝臨幸常視事於此後爲慶霄樓每逢臘日高宗奉皇太后觀冰嬉之所也西有揖山亭下曰一房山由房內南間石巖蟠旋而下爲蟠青室由悅心殿循山西行渡石橋爲琳光殿殿後爲甘露殿庭多奇石環繞皆水又後有殿曰水精域

宮六續宮十七

#### 闕古樓

闕古樓在琳光殿北延樓二十五楹左右圍抱相合乾隆丁卯以內府所藏三

希堂法帖石刻列嵌樓壁樓之北爲畝鑑室乾隆癸酉於山麓闢地得古井一泓因顏其室 宮六

漪瀾堂

漪瀾堂據瓊島而俯液池略仿金山爲之正中北向爲碧照樓長廊六十楹左右環繞俱有樓東盡倚晴樓西盡分涼閣碧照樓之左爲遠帆閣閣後爲道寧齋漪瀾堂之右爲紫翠房東有蓮華室堂後石洞出山頂有亭爲摺扇形曰延南薰其東山上有亭曰一壺天地亭東爲環碧樓下爲嵌巖室由延南薰亭西渡石橋有亭曰小崑丘石磴委宛而上有平臺石柱爲銅仙承露即道寧齋後也西南爲得性樓樓下爲延佳精舍樓之左下翼以山廊歷磴而下爲隣山書屋環碧樓西爲盤嵐精舍石洞攀援而上爲寫妙石室出石洞爲酣古堂堂南

邀山亭亭東北爲古遺堂堂相對爲巒影亭堂下爲見春亭亭南即智珠殿殿前有橋渡橋而東即陟山門也 宮六 續宮十八

春雨林塘畫舫齋濠濮閒鏡清齋諸景

承光殿之東與蕉園門相對者爲桑園門入門循池東岸而北過陟山門水殿一區藏御舟有堂據山顛北向曰雲岫厂南向曰崇椒室由崇椒長廊北下有軒臨池曰濠濮閒池三面壘石爲山東有水洞二軒北有石梁曲折池而北接石坊由石門而北爲春雨林塘池北相對爲畫舫齋池上兩廊各有室東曰鏡香西曰觀妙齋左水石閒有古槐一搆亭曰古柯庭後有奧曠室齋右池上架石梁達西室曰小玲瓏水殿之北爲龍王廟廟後有小渠互之自太液池注水入春雨林塘者也再北即蠶壇由蠶壇沿堤西北爲鏡清齋齋東臨池有室爲

抱素書屋有罨畫軒焙茶塢齋西有畫峯室齋後有沁泉廊枕巒亭 宮六

蠶壇

先蠶壇在西苑東北隅乾隆七年議親蠶命建壇爲壇一成方四丈高四尺東爲觀桑臺前爲桑園後爲親蠶殿殿後爲浴蠶池池北爲後殿其東爲先蠶神殿有蠶署蠶所 宮六

按康熙時於豐澤園左立蠶舍雍正間議建祠北郊比先農乾隆年以郊道遠且水源不通無浴蠶所唐宋時后妃親蠶多在宮苑中明代亦建於西苑遂救改築

西天梵境

西天梵境由鏡瀦齋沿堤而西南有琉璃牌坊南臨太液池北山門榜曰西天

梵境入門爲天王殿殿後爲大慈眞如寶殿殿後歷級而登有大琉璃寶殿四面迴廊各有樓相接西天梵境之西有琉璃牆屏障俗稱九龍碑墻北爲大圓鏡智寶殿殿後有亭曰寶網雲改建佛樓殿及左右屋宇四十三楹皆貯四藏經板之所也 宮六續 宮十八

### 五龍亭

太液池之北有亭五中曰龍澤左曰澄祥曰滋香右曰湧瑞曰浮翠亭建水中面臨北海所謂五龍亭也 宮六

### 闡福寺

闡福寺舊爲閒館聖祖常奉皇太后避暑於此乾隆年改建佛寺中爲大佛殿規制宏敞仿正定隆興寺重宇三層寺東爲澄觀堂浴蘭軒快雪堂寺西有方

殿曰極樂世界再北爲萬佛樓樓前東樹寶幡杆西立石幢刻清字蒙字西番字樓南曰普慶門設石幢二東有澄性堂鏡藻軒澹吟室清約池西有妙香亭樹石塔上鐫貫休畫十六應真像萬佛樓之西有門外即陽澤門通道也

宮六 續宮十八

快雪堂

快雪堂在闡福寺東兩廡刻快雪堂法帖乾隆己亥得快雪石刻築堂爲廊以嵌石版 續宮十八

按御製快雪堂記楊景素以快雪堂石刻來獻云爲故臣馮銓所集後歸閩之黃氏復不能守故賞之以獻石版長短不一且有木刻三因命內府善手重撫而泐之石俾較若畫一其木版仍置堂中

# 經費

## 鋪宮

皇太后鋪宮玉盞金臺一副金執壺二金方一金盤十五金碟六金盃五金茶  
甌蓋一嵌松石金匙一金匙二金鑲牙箸一雙金雲包角桌二銀方一銀盃一  
銀盤四十銀碟十銀盃十五銀茶甌蓋十銀匙十五銀鑲牙箸十雙銀茶壺三  
銀背壺十五銀銚四銀火壺二銀鍋二銀罐三銀杓四銅提爐二銅八卦爐四  
銅手爐二銅瓦高燈六銅遮燈二銅臘簽十四銅剪燭罐八副銅簽盤五銅簪  
二銅簸箕一錫盆十錫池二錫茶盃蓋五錫茶壺三十四錫背壺四錫火壺二  
錫坐壺八錫裏冰箱二錫屨鞋二鐵八卦爐一鐵火爐十鐵火罩六鐵坐更燈

六鐵火鑷四黃磁盤二百五十各色磁盤百黃磁碟四十五各色磁碟五十黃  
磁盤百各色磁盤五黃磁鍾三百各色磁鍾七十各色磁杯百磁渣斗六洋漆  
矮桌二漆合三十漆茶盤十五漆皮盤二十五戳燈三十香燈十四羊角手把  
燈八 皇后同 皇貴妃貴妃妃嬪不用金貴人常在答應皇子福晉不用銀  
均以次減 經一

年例

皇太后年例金二十兩銀二千兩蟒緞補緞織金粧緞各二疋倭緞四疋閃緞  
一疋金字緞二疋雲緞七疋衣素緞四疋藍素緞帽緞各二疋楊緞六疋宮綢  
二疋潞綢四疋紗八疋裏紗綾紡絲杭紬綿紬高麗布各十疋毛青布四十疋  
三線布粗布各五疋金線二十絡絨十斤棉線六斤木棉四十斤二號銀鈕三



號銀鈕各二百二等貂皮十三等貂皮二十五等貂皮七十裏貂皮海龍皮各十二 皇后銀一千兩皇貴妃銀八百兩貴妃銀六百兩妃銀三百兩嬪銀二百兩貴人銀一百兩常在銀五十兩答應銀三十兩餘物均以次減 皇子福晉不領銀 公主銀二百四十兩 官女子銀六兩家下女子銀五兩乳母保母各銀二十四兩米二十四斛 經一 皇子上學後月銀三十兩成婚後月銀五百兩 皇孫成婚後月銀二百兩

續經一

日用

皇太后宮日用猪一口羊一隻鷄鴨各一隻新粳米二升黃老米一升五合高麗江米三升粳米粉三斤白麵十五斤蕎麥麵麥子粉各一斤豌豆折三合芝

麻一合五勺白糖二斤一兩五錢益糖蜂蜜各八兩核桃仁四兩松仁二兩枸  
杞四兩曬乾棗十兩猪肉十二斤香油三斤十兩雞蛋二十個麵筋一斤八兩  
豆腐二斤粉鍋渣一斤甜醬二斤十二兩清醬二兩醋五兩鮮菜十五斤茄子  
二十個王瓜二十條白蠟七枝黃蠟二枝羊油蠟二十枝羊油更蠟一枝紅羅  
炭夏二十斤冬四十斤黑炭夏四十斤冬八十斤 皇后皇貴妃妃嬪貴人常  
在答應及皇子福晉均以次減 官女子乳母保母各猪肉一斤老米七合五  
勺黑鹽三兩隨時鮮菜十二兩家下女子猪肉半斤老米七合五勺黑鹽三兩  
隨時鮮菜十兩 經一

皇子皇孫公主日用油蠟黑炭夏冬各如例 續經一

恭進

皇太后聖壽恭進銀一萬兩大號小珍珠三百串小珍珠三百串大號小珊瑚珠三百串小珊瑚珠三百串上用緞紗等六十三疋官用緞紗三十七疋乾隆年恭遇太后大慶於年例外恭進壽禮九九凡五日爲玉如意佛壽星圖畫及陳設服用等物 經二

恩賜

皇后千秋恩賜金九十兩銀九百兩上用緞紗等四十五疋 皇貴妃貴妃妃千秋嬪壽辰貴人生辰恩賜緞綢果桌各以次減 經三

皇后誕生皇子公主彌月恩賜銀一千兩幣三端 皇貴妃貴妃妃嬪貴人常在答應誕生皇子公主彌月恩賜各以次減 經三

皇子福晉誕生皇孫恩賜銀二百兩幣四十端 經三

皇子生辰恩賜九百兩 續經二

公主生辰恩賜表裏十二端 經續二

吉禮例用

坤寧宮祀神四盃每次用金銀各二錠龍緞蟒緞粧緞片錦閃緞倭緞補一疋  
緞三疋細布二十疋 春秋豎杆大祭每次用九色潞紬綾各九尺白夏布二  
尺頭號高麗紙四張三號高麗紙八十一張竹料連四紙三十二張棉線三斤  
八兩絃一兩染紙槐子十斤白礬二斤撒滿衣二分 每月敬神用高麗紙頭  
號四張三號五十四張竹料連四紙二十四張棉線一兩五錢 堂子浴佛用  
棉花八兩高麗紙頭號一張三號二十七張棉線五錢撒滿衣二分 春秋祭  
馬神用紅潞綢七丈一尺二寸五分青潞綢一丈九尺一寸六分綠潞綢二尺

三號高麗紙二十七張竹料連四紙八張棉線五錢藍布幔五架 凡衣幔用  
畢仍交庫 經三

嘉禮例用

冊立皇后補行納采禮文馬十鞍轡具幣百端布二百疋甲冑十大徵禮金二百兩銀萬兩金茶器一銀茶器二銀盃盆二幣千端文馬閑馬馱甲各二十賜后父母金百兩銀五千兩金茶器銀茶器銀盃盆各一帛五百疋布千疋馬六弓一張矢一服朝服冬夏各一襲衣各二楯貂裘各一帶一甲冑一 經三  
皇子娶福晉行初定禮金項環一金珥六金釵六金鐲二金鈕一百銀鈕二百幣百端棉三百斤五等貂皮七十索倫黃貂皮七十沙皮一百六十白狐皮九十海龍皮七染貂皮三賜福晉父母金十兩銀七百兩狐皮朝服一金帶一分

緞靴襪各一雙文馬二金珥六青狐皮一海龍皮六初定禮設筵宴於福晉家用羊四九饌饌桌五十張酒宴五十席成婚禮設筵宴於箭亭並長房內用羊五九內合悉用者五饌饌桌四十張酒宴六十席黃酒六十瓶 經三

公主下嫁初定禮筵宴皇帝前筵宴設六十席乳酒黃酒共七十瓶羊三十六皇太后宮筵宴設三十席乳酒黃酒共二十瓶羊十八皇太后皇帝皇后皇貴妃貴妃妃嬪常用桌各一張成婚筵宴禮同 經三

皇子周歲啐盤玉器二玉扇器二金匙一銀盒一犀盃一犀棒二弧矢各一文房一分中品果一張皇孫同公主皇孫女並同惟去弧矢 經三

筵宴例用

皇帝筵宴用玉盞金臺二分金瓶三折盃三執壺二杓二盃盤十分大鍾二十

碗二十玉盞金盤二分銅鍍金大酒盃六十皇太后金瓶一折盃一執壺二杓  
一大鍾二十四盃盤十分銅鍍金大酒盃四十皇后金瓶一折盃一執壺二杓  
一 經三 續經二

內廷筵宴例用黃緞牀刷二金黃緞牀刷二十二地平刷二俱用畢交庫絹宴  
花五百枝一年一次換進通草宴花九十枝一年四次換進宴上各樣牌子四  
百三十五個五年一次換進 經三

每年上元並上元前一日除夕皇帝宴蒙古王台吉用饔饩桌九十張酒四十  
瓶獸肉五十斤如遇風雪不能筵宴即將桌張頒賜每年上元後一日皇太后  
筵宴外藩公主格格福晉等用常宴桌二十張 經三

每年正月十四十五等日並除夕皇太后皇帝皇后暨皇貴妃貴妃妃嬪前及

皇子公主福晉前各用拉拉桌張餽餽桌張 經三

錢糧事例

一 宮殿監每年奏請向廣儲司領銀五萬兩交庫貯用於每月底開具四柱奏銷 一 內廷需用各項錢糧應於內務府領用者由宮殿監用敬事房圖記按例支領每月仍呈報內務府總管查對 一 奉特旨賞人銀兩仍將某人傳旨之處入於月底奏銷摺內奏聞 一 內廷年例銀兩按例支給 一 官女子乳母保姆日用豬肉俱准折銀支給 一 各宮官女子至二十五歲俱令出宮凡進內十五年以上者賞銀三十兩十五年以下者二十兩十年以內者十兩 一 官房按月取租當舖按年取利並交敬事房庫貯俟有公項雜差等事酌量支用年底奏銷 一 總管首領太監等隨駕外出俱賞給盤費官飯由宮殿監屆時奏明行文各該處按例支領 經三 續經三



# 官制

## 內監官制

康熙十六年設敬事房屬內務府管轄置總管副總管專司宮內一切事務俱照定例敬謹奉行嗣定五品總管一員五品太監三員六品太監二員雍正元年以內務府係三品衙門其所屬敬事房總管應授四品副總管六品隨侍等處首領七品宮殿等處首領八品乾隆七年定宮中現行則例太監官職以四品爲定永不加至三品以上官一

按四品總管銜曰宮殿監督領侍五品總管銜曰宮殿監正侍六品總管銜曰宮殿監副侍首領太監銜二七品曰執守侍八品曰侍監又有副首

領筆帖式等

欽定則例

一宮內等處太監官職按照額定奏補其特賞不在額數者缺出不准奏補  
一各處太監恩加錢糧俱按定例額數不許增添 一每年年底於崇文門取  
銀二千五百兩賞給各處總管首領太監等宮殿監二百兩四執事四執事庫  
一百五十兩自鳴鐘處四十兩懋勤殿乾清宮各六十兩養心殿一百兩弘德  
殿四十兩尙乘轎一百兩烏槍處弓箭匠處按摩處各十兩御藥房十兩御膳  
房御茶房各二百兩乾清門內左門內右門月華門各三十兩遵義門二十兩  
做鐘處三十兩造辦處八十兩南花園三十兩圓明園一千兩 一每年年底  
於廣儲司取制錢一千五百串恩賞衆太監等酌定請旨 官一

處分則例

宮殿監處分則例十一條頭等處分罰月銀一年次等罰六個月三等罰三個月宮殿監督領侍等秉公稽查有犯者即引例參奏處分累犯不知改悔者請旨交內務府治罪 各處首領太監處分則例十六條頭等處分責六十板次等責四十板三等責二十板有首領犯者即引例參奏處分太監犯者即按例責處累犯不改旨交內務府治罪 又宮殿監凡例四條太監等在外犯法由部院奏明提人者宮殿監查奏送出按律治罪宮殿監遇議行責處事件其有則例內所不該者許引例比擬奏聞請旨 官一

宮監額數職掌

敬事房總管三員副總管六員委署總管無定額首領二名筆帖式四名太監

二十六名專司奉諭辦理宮內一切事務及應行禮儀承行內務府各衙門文  
移收取外庫錢糧調補內監查視各門啓閉巡察火燭關防等事 乾清宮首  
領四名續裁二太監二十四名續增一專司尊藏寶錄聖訓江山社稷金殿香  
燭收貯賞用器物本處陳設灑掃及御前坐更等事 乾清門首領二名太監  
十二名專司陳設御門聽政寶座黼辰晨昏啓閉稽察出入及灑掃坐更等事  
昭仁殿兼龍光門弘德殿兼鳳彩門首領各二名太監各十名俱專司陳設  
灑掃坐更等事 端凝殿兼自鳴鐘首領一名太監十名專司近御隨侍賞用  
銀兩驗自鳴鐘時刻及陳設灑掃御前坐更等事 懋勤殿兼本房首領二名  
太監十名專司伺候宸翰及收掌文房書籍筆墨物件載內起居注御前坐更  
等事 四執事首領一名續增副首領一太監三十五名專司伺候御用冠袍

帶履隨侍執傘執爐承應上用甲冑收貯備賞衣服及御前坐更等事 四執  
事庫首領一名太監十八名續增二專司收掌上用冠袍帶履舖陳寢宮幃幔  
及坐更等事 奏事處屬四執事首領兼管續增首領一太監十八名續減一  
專司宣傳諭旨引帶召對人員承接題奏事件隨侍御前坐更等事 日精門  
月華門首領各二名太監各八名俱專司啓閉關防灑掃坐更等事 上書房  
屬日精門首領兼管太監四名專司供獻先師孔子香燭陳設坐更等事 南  
書房屬月華門首領兼管太監四名專司應候內廷翰林出入坐更等事 尙  
乘轎首領二名太監三十二名專司承應請轎隨侍御前坐更等事 御藥房  
首領二名太監二十名專司帶領御醫各宮請脈煎製藥餌坐更等事 交泰  
殿首領二名太監六名專司尊藏御寶收貯勳臣黃冊驗自鳴鐘時刻陳設灑

掃坐更等事 坤寧宮兼坤寧門首領二名太監十二名專司供神香燭陳設  
灑掃關防坐更等事 東暖殿兼永祥門西暖殿兼增瑞門首領各一名太監  
各十四名俱專司陳設灑掃坐更等事 景和門隆福門基化門端則門首領  
各二名太監各八名專司啓閉關防灑掃坐更等事 內左門內右門首領各  
二名太監各十二名專司啓閉關防稽查茶膳房人等及衆太監等出入每晚  
起更時候宮內等處報無事畢具單呈送敬事房并灑掃坐更等事 景仁永  
壽承乾翊坤鍾粹儲秀延禧啓祥永和長春景陽咸福十二宮首領各二名太  
監各十二名專司本宮陳設灑掃承應傳取坐更等事 近光左門屬景仁宮  
首領兼管近光右門屬永壽宮首領兼管太監各五名專司啓閉關防灑掃坐  
更等事 養心殿重華宮建福宮三處首領共四名續裁一太監四十五名專

司陳設器具及收貯賞用物件灑掃坐更等事 養心殿內兼吉祥門總管一員首領五名太監五十名專司近御隨侍收掌內庫錢糧及古玩書畫陳設灑掃御前坐更等事 御書房首領一名太監十二名續全省以景陽宮首領太監等兼專司收貯書籍字畫灑掃坐更等事 古董房首領一名太監十二名專司收貯古玩器皿坐更等事 御茶房首領七名續裁二太監四十五名續增五專司上用茗飲果品及各處供獻節令宴席隨侍坐更等事 御膳房總管三員續裁一首領十名續裁四太監一百名專司上用膳饈各宮饌品各處供獻節令宴席隨侍坐更等事 鳥槍處首領一名太監四名專司隨侍上用鳥槍御前坐更等事 弓箭處屬鳥槍處首領兼管太監四名續增一專司隨侍上用弓箭御前坐更等事 按摩處屬鳥槍處首領兼管太監六名專司隨

侍請髮御前坐更等事 南果房首領一名太監八名專司收貯果品坐更等事 鷹房首領二名專司畜養鷹鷂坐更等事續全裁 狗房首領二名太監十名專司畜養獵犬隨侍承應御前坐更等事續全裁 養牲處首領一名太監三名專司畜養禽獸坐更等事續全裁 鴿子房屬蒼震門首領兼管太監三名專司畜鴿坐更等事續全裁 蒼震門首領二名續裁一太監八名續裁二專司啓閉關防祭神房人等出入灑掃坐更等事 遵義門首領二名續裁一太監八名續裁二專司啓閉關防灑掃坐更等事 齋宮首領一名太監八名專司陳設灑掃坐更等事 毓慶宮首領二名太監十二名專司陳設灑掃及坐更等事續增 御花園首領副首領各二名續各裁一太監二十四名專司園內斗壇四神祠香燭培澆花樹飼養仙鶴池魚灑掃坐更等事 天穹殿



首領二名續裁屬景陽宮首領兼管太監八名專司香燭灑掃坐更等事 祭  
神房首領二名副首領一名太監二十六名專司祭神省牲坐更等事 中正  
殿英華殿首領各一名太監各四名專司香燭灑掃等事 欽安殿兼城隍廟  
首領三名續裁二太監十二名續增十二俱充道士專司唵誦經懺焚修香火  
等事 壽皇殿首領一名續增副首領一太監四名續增六專司供奉御容前  
香燭灑掃坐更等事 兆祥所首領一名續兼遇喜處太監十名續裁四專司  
灑掃 打掃處首領一名續增一太監七十五名續兼十五專司各處灑掃運  
水添缸一應雜差坐更等事 熱火處首領二名太監五十名專司各處安設  
熱火運送柴炭一應雜差坐更等事 柴炭處燒炕處首領各二名太監各二  
十五名續裁由打掃處兼 造辦處首領二名續裁一太監二十五名續裁二

十一專司帶領造辦處外匠造辦一切物件 做鐘處首領一名太監十名續增 北小花園首領一名太監六名專司培灌花樹灑掃等事 南花園首領一名太監七名續增 讀清字書房屬敬事房首領兼管太監六名專司學習清文 讀漢字書房屬瀛臺首領兼管太監十名專司學漢文 皇太后宮副總管二員首領五名續裁四太監四十六名茶房膳房藥房首領各一名太監三十六名 太妃位下首領二名續裁一太監十名太嬪位下首領一名太監八名膳房首領三名太監三十二名續裁八 慈寧宮續增佛堂首領十名續裁五增副首領二太監五十二名續裁二十內充喇嘛者十五學經四 壽康宮副首領二名續裁改首領一太監六名 寧壽宮首領四名太監十六名續增三十四 皇子位下首領一名太監二十名續增五 公主位

下首領一名太監四名 續增皇孫皇曾孫首領二太監十七  
景山總管一員首領二名委署首領無定額太監八名 南府總管一員首領  
四名委署首領太監無定額 瀛臺續兼武成殿首領一名副首領一名續增  
一太監二十二名 永安寺續兼承光殿首領一名副首領一名續增一太監  
十名 春雨林增首領一名副首領一名太監八名續省 畫舫齋兼蠶壇首  
領一名副首領二名太監十四名續增 開福寺屬永安寺兼管太監二名  
雍和宮首領一名副首領一名續裁太監六名續裁二專司陳設灑掃等事  
圓明園兼長春園靜寄山莊總管三員續裁二增副總管四首領十名副首領  
十八名續增四委署首領四十二名續增九太監四百六名續增一百二十六  
內有技勇七十

清漪園靜明園靜宜園總管二員清漪園首領三名副首領五名太監一百四名靜明園首領一名副首領二名太監五十四名靜宜園首領一名副首領二名太監四十四名暢春園總管二員首領十名副首領五名太監四十名湯山首領一名太監四名續均歸圓明園兼

避暑山莊總管一員首領二名太監二十名續歸宮內總管首領太監等兼太和殿中和殿保和殿首領四名太監十名文華殿武英殿太監各二名續均裁

奉先殿首領二名續裁一副首領五名續裁四太監二十名續裁六  
內務府所屬 掌儀司首領五名續裁三副首領八名續裁四太監一百名續  
減四十司樂太監六十名續增二十並增副首領二圓清太監六名勛斗太監

十四名續均裁 鑾儀衛副首領四名續裁三改首領一太監三十名續裁二  
十四 營造司首領二名續裁一副首領二名太監四十名續裁十 尙衣監  
太監二名武備院太監二名酒醋房首領一名太監三名奉宸院首領二名太  
監十名續均裁

禮部所屬 萬善殿首領四名太監十五名俱充僧番經廠首領二名太監十  
名俱充喇嘛漢經廠首領二名太監六名俱充僧道經廠首領二名太監十名  
俱充道士續均裁

工部所屬 門神庫首領一名太監八名 簾子庫首領一名太監八名  
太常寺所屬 太廟首領一名續增副首領一太監二十名 社稷壇首領一  
名太監四名 傳心殿首領一名太監四名續裁

陵寢內務府所屬 陵寢各首領二名續裁一太監十名續裁七 妃園寢屬  
本陵首領兼管太監六名續裁 官二續官三  
續增永安寺一首領一名太監七名俱充喇嘛又太監六名習喇嘛經 太西  
天首領一名太監九名俱充喇嘛 續官三

按宮監官制約分三類一差使如總管副總管首領副首領等是一品級  
自四品至八品如總管分四五六七品首領分六七八品等是一銜名分  
宮殿監督領侍宮殿監執守侍侍監太監五等如四品總管以宮殿監督  
領侍及宮殿監充之五六品正副總管宮殿監充之七品正副首領執守  
侍是充之八品正副首領侍監充之等是此其大略也

又按宮監錢糧總管月銀五兩至八兩米五斛至八斛副總管月銀五兩

至七兩米五斛至七斛首領副首領月銀三兩至四兩米三斛至四斛均有公費制錢自七百至一貫三百太監月銀二兩至三兩米至一斛半至三斛公費均制錢六百內務府所屬者銀米公費均較減

# 書籍

## 實錄

太祖實錄十卷崇德年纂康熙年重修雍正年校訂 太宗實錄六十五卷順  
 治年纂康熙年重修雍正年校訂 世祖實錄一百四十六卷康熙年纂雍正  
 年校訂 聖祖實錄三百卷雍正年纂 世宗實錄一百五十九卷乾隆年纂  
 高宗實錄一千五百卷嘉慶年纂 書一續書一

## 聖訓

太祖聖訓四卷 太宗聖訓六卷 世祖聖訓六卷 聖祖聖訓十卷 世宗  
 聖訓三十六卷 高宗聖訓三百卷 聖祖庭訓格言 聖祖聖諭廣訓 世



宗上諭八冊 世宗硃批諭旨百十二冊 世宗上諭八旗三十卷 世宗欽  
定訓飭州縣規條 書二續書二

御製

世祖御製人臣儆心錄八篇 聖祖御製文集四十卷二集五十卷三集五十  
卷四集三十六卷 避暑山莊三十六景詩并圖 千叟宴詩四卷 耕織圖  
詩 世宗御製文集三十卷 朋黨論 高宗樂善堂全集三十卷 御製詩  
初集四十四卷二集九十卷三集一百卷四集一百卷五集一百卷 御製文  
初集三十卷二集四十四卷三集十六卷詩文餘集二十二卷 日知薈說四  
卷 圓明園四十景詩 盛京賦 冰嬉賦 書三  
仁宗味餘書屋集四十二卷 御製詩初集四十八卷 御製文十卷

書三續書三

按高宗御製詩序予詩五集釐爲四百三十卷總計四萬一千八百首在潛邸所著者尙不入此數以望九之年所積篇什幾與所輯全唐詩相埒可不謂藝林佳話乎

欽定

四庫全書薈要凡一千二百六十六冊四百六十四部內經部百七十三種史部七十種子部八十二種集部百三十九種 續書八

四庫全書凡三萬六千二百七十五冊三千四百九十部七萬九千三百三十八卷內經部六百九十五種史部五百六十四種子部九百三十一種集部一千三百九十種 續書十

方略

聖祖親征平定朔漠方略四十八卷 治河方略十二卷 高宗平定金川方略二十六卷 平定準噶爾方略一百七十二卷 開國方略三十三卷 臨清紀略十六卷 蘭州紀略二十四卷 石峯堡紀略十卷 臺灣紀略七十卷 安南紀略三十二卷 廓爾喀紀略五十四卷 平苗紀略五十六卷 平定三省紀略 書四 續書十一

典則

聖祖幸魯盛典 萬壽盛典初集百二十卷 大清會典二百五十卷康熙年纂修雍正年重輯嘉慶年增修 高宗欽定大清會典一百卷則例一百八十八卷 大清通禮五十卷 皇朝禮器圖式十八卷 宮中則例二卷重修四卷

詞林典故八卷續纂六十四卷 吏部則例六十卷 學政全書四卷 科  
場條例四卷磨勘簡明條例四卷 中樞政考十八卷又重修一百六十八卷  
大清律例四十八卷續纂條例并總類各二卷 督捕則例二卷 工部則  
例五十卷 乘輿儀仗做法二卷 工部做法七十四卷 內廷工程做法八  
卷物料價值四卷 軍器則例三十六卷 南巡盛典一百卷 八旬萬壽盛  
典一百二十卷 滿洲祭神祭天典禮六卷 續通典一百四十四卷 皇朝  
通典一百卷 戶部鼓鑄則律 太常寺則例 書五 續書十二

經學

聖祖御纂周易折中二十二卷 日講易經解義十八卷 周易述義十卷  
欽定書經傳說彙纂二十四卷 日講書經解義十三卷 詩經傳說彙纂二

十四卷 日講詩經解義 詩義折中二十卷 春秋傳說彙纂三十八卷  
日講春秋解義六十四卷 日講禮記解義六十四卷 日講四書解義二十  
六卷 經筵講章四卷 性理精義十二卷 高宗御纂春秋直解十二卷  
欽定三禮義疏 御覽經史講義 詩經樂譜全書三十卷 樂律全書 琴  
譜 書六 續書十三

史學

太祖本紀二卷 太宗本紀四卷 世祖本紀八卷 聖祖本紀二十四卷  
世宗本紀八卷 明史三百二十六卷 聖祖御批資治通鑑綱目一百四卷  
日講通鑑解義 高宗御撰通鑑綱目三編四十卷 歷代年表一百卷  
釋史百六十卷 宗室王公功績表傳十二卷 蒙古回部王公表傳一百二

十卷 國史列傳 國史年表 國史忠義傳 貳臣傳三十卷 逆臣傳二卷 御纂評鑑闡要十二卷 御批通鑑輯覽一百二十卷 訂正通鑑綱目續編 古今儲貳金鑑六卷 續文獻通考二百五十卷 皇朝文獻通考三百卷 歷代職官表七十二卷 明臣奏議四十卷 皇清奏議 勝朝殉節諸臣錄十二卷 功臣傳三集六十五卷四集十二卷續集六十六卷又二十三卷又七十二卷又九十六卷 書七 讀書十四五六

儀象

聖祖御製律歷淵源一百卷 御定星歷考原 歷代三元甲子編年萬年書 高宗欽定律呂正義後編一百二十卷 儀象考成後編三十編 御製協紀辨方書三十六卷 天文正義八十卷 萬年書十二卷 書八

志乘

大清一統志康熙年勅修三百五十六卷乾隆重修四百四十二卷 皇輿表  
十六卷 雍正八旂通志初集二百五十卷乾隆重修三百五十四卷 乾隆  
八旂氏族通譜八十卷 盛京通志三十二卷重修一百三十卷 皇輿西域  
圖志四十六卷 清涼山新志十卷重修一百二十卷 盤山志十六卷 皇  
朝通志一百四十四卷 熱河志一百二十卷 滿洲源流考二十卷 蒙古源  
流八卷 日下舊聞考一百六十卷 河源紀略三十五卷 契丹國志十七  
卷 書九 讀書十七

字學

聖祖康熙字典十二集 音韻闡微十八卷 清文鑑二十卷乾隆增訂四十

八卷 清文合蒙古鑑五十卷 高宗叶韻彙輯十卷 同文韻統六卷 西  
域同文志二十四卷 盛京賦清漢三十六體篆字書 篆文六經四書 音  
韻述微一百六卷 滿珠蒙古漢字三合切音清文鑑三十三卷 清漢對音  
字式一卷 遼金元三史語解四十六卷 書十讀書十八

類纂

世祖御製資政要覽 勸善要言 孝經衍義百卷 內則衍義十六卷 聖  
祖御纂朱子全書六十六卷 世宗欽定執中成憲 高宗欽定四庫全書總  
目提要二百卷 四庫全書考證一百卷 千叟宴詩三十六卷 重舉千叟宴  
詩三十六卷 萬壽衢歌六卷 十全集五十四卷 孚惠全書六十四卷  
淳化閣帖釋文十卷 仁宗欽定辛酉工賑紀事三十八卷 熙朝雅頌集一



百三十四卷 書十一 讀書十九

總集

聖祖淵鑑齋古文選六十四卷 歷代賦彙一百八十二卷 全唐詩九百卷  
全唐詩錄一百卷 御選唐詩三十二卷 宋金元明四朝詩三百十二卷  
全金詩七十二卷 佩文齋詠物詩 歷代題畫詩一百二十卷 歷代詩  
餘 詞譜四十卷 世宗悅心集四卷 高宗唐宋文醇五十八卷 唐宋詩  
醇四十七卷 皇清文穎百卷 四書文 書十二

類書

聖祖古今圖書集成一萬卷 淵鑑類函四百五十卷 佩文韻府一百六卷  
拾遺二十四卷 子史精華一百六十卷 駢字類編二百四十卷 分類字

錦六十四卷 佩文齋廣羣芳譜一百卷 書畫譜一百卷 高宗授時通考  
七十八卷 讀書記數略五十四卷 書十三

目錄

高宗天祿琳瑯十二卷續編二十卷 西清古鑑五十六卷續鑑二十卷 石  
渠寶笈四十卷 祕殿珠林石渠寶笈續編 西清硯譜二十四卷  
書十二 讀書十九

鑒藏

高宗御題四庫全書易傳燈等五十九種 續書四  
御題天祿琳瑯宋版漢書等二十四部金版貞觀政要一部影宋鈔周易輯聞  
等五部元版大學衍義等六部明版東觀餘論等二部 鑒藏宋版周易等四

十七部影宋鈔復齋易說等十五部元版周易本義啓蒙翼傳等七十九部明  
版韓詩外傳等二百五十部 御題天祿琳琅續編宋版易傳等七部影宋鈔  
班馬字類等二部共九部 鑒藏宋版周易等二百二十三部影宋鈔易小傳  
等九部遼版龍龕手鑑一部影遼鈔龍龕手鑑一部金版重修政和殿經史證  
類備用本草一部元版學易記等一百十六部明版關氏易傳等二百八十九  
部明鈔尙書類纂等八部 續書五六

五經萃室宋版易詩書春秋禮記五經一部 續書七

校刻

重刻十三經 二十一史 性理大全 通典 通志 文獻通考 古香齋  
袖珍四書五經 史記 綱目三編 古文淵鑑 朱子全書 淵鑑類函

初學記 施注蘇詩 春明夢餘錄 仿宋版五經 重輯舊五代史 補刊  
通志堂經解 論語集解義疏 補後漢書年表 唐會要 九家集注杜詩  
武英殿聚珍版式 武英殿聚珍版叢書一百二十六種  
書十四 續書二十

石刻

聖祖懋勤殿法帖二十八卷 淵鑑齋法帖十卷 避暑山莊法帖 世宗朗  
吟閣法帖十六卷 四宜堂法帖八卷 高宗敬勝齋法帖二十冊 三希堂  
法帖三十二卷 墨妙軒法帖四卷 書十五  
御筆乾隆說經文碑 御定石經一百九十碑 重排石鼓文 重刻淳化閣  
帖 蘭亭八柱帖 重修快雪堂帖 補刊明代端石蘭亭圖帖 御製新樂

府帖等六十九種 節年聯句詩帖四十二種 續書二十一

圖畫

圖像 南薰殿藏歷代帝后聖賢畫像七十九軸十五冊三卷 紫光閣功臣  
畫像二百八十幅 茶庫貯歷代功臣畫像二十一軸三冊 續書二十二  
圖刻 太祖實錄戰圖八冊 盛京事蹟圖五卷 平定伊犁回部全圖三十  
四幅 平定兩金川得勝戰圖十六幅 平定臺灣戰圖十二幅 平定廓爾  
喀戰圖八幅 平定安南戰圖六幅 平定苗疆戰圖十六幅 平定狝苗戰  
圖四幅 續書二十三、四

圖繪 天盤星斗圖一幅 西洋天球地球圖一分

輿圖

坤輿全圖清字一分 坤輿全圖漢字一分 皇輿全圖十卷 皇輿斜格全圖四卷 皇輿十排全圖十卷 大清中外全圖一分 天下全圖一分 十五省圖一分 陵寢風水等圖十五幅 灤河濡水源圖一卷 東三省地方圖等二十四種 京城全圖等十八種 江南全省輿圖等十二種 江西全省輿圖等十五種 浙江全省輿圖等二十五種 福建輿圖等三種 湖廣全省輿圖等二十五種 河南全省輿圖等十種 山東全省輿圖等七種 山西全省輿圖等十一種 陝西全省輿圖等十二種 廣東全省輿圖等二十五種 廣西全省輿圖等十二種 四川全省輿圖等八種 雲南全省輿圖等六種 貴州全省輿圖等六種 蒙古回部朝鮮金川俄羅斯衛藏諸境圖等三十九種 盛京至瓊州海等江海圖四十二種 黃河發源圖等河道

圖五十九種 平定兩金川等武功圖十九種 避暑山莊等巡幸圖三十八種 泰山等名勝圖三十六種 瑞穀等瑞應圖二種 琉球國等効貢圖六種 兩淮產鹽行鹽等鹽地圖四種 曲阜聖廟等寺廟圖十九種

續書二十五六

按宮史書籍均已錄前茲補輯嘉道後書目以御製欽定者爲限餘不錄  
仁宗實錄三百七十八卷 宣宗實錄四百八十卷 文宗實錄三百六十卷 穆宗實錄三百八十卷 德宗實錄六百一卷 附宣統大政記十二卷 仁宗聖訓一百十卷 宣宗聖訓一百三十卷 文宗聖訓一百十卷 穆宗聖訓一百十卷 德宗聖訓一百四十五卷 仁宗御製文二集十四卷詩二集六十四卷詩三集六十四卷詩文餘集八卷全史

詩六十四卷 宣宗養正書屋全集四十卷 文初集十卷 詩初集二十四卷 詩文餘集十八卷 文宗詩文集十卷 穆宗詩文集十六卷 德宗詩文集六卷 平苗紀略五十六卷 平定教匪紀略四十二卷 勦平三省邪匪方略四百卷 平定回疆方略八十六卷 平定七省方略一千一百五十六卷 道咸同三朝籌辦夷務始末二百六十卷 重修大清會典事例並圖一千五百卷 重修大清一統志五百卷 西巡盛典二十四卷 星源集慶六冊 海運新案十卷續六卷 仁宗本紀二十六卷 宣宗本紀三十二卷 文宗本紀二十五卷 穆宗本紀五十五卷 新疆識略十二卷 祕殿珠林三編 石渠寶笈三編 天祿琳瑯書目後編二十卷 全唐文一千卷



# 跋尾

## 宮史錄副

宮史向藏內廷不得傳閱梁文忠公鼎芬入直劉翰怡承幹乞錄副本錄竣而公薨書存未發及余入直羅叔言振玉始領出付刊即天津博愛印刷局印行本也

## 宮史續編錄副

宮史續編世初不知有是書余爲內務府大臣時曾請發閱嗣爲清史館調取及余校刻清史始錄副本擬刊未果今所傳者故宮博物院圖書館校印本也

## 宮史錄要

宮史正續一百三十六卷卷帙過繁所載以御製詩文爲多余乃去文存實輯其事實爲錄要猶十餘卷今復續爲輯略並加按語各標細目文省事增庶便閱覽雖所存不及十之一而清宮掌故粲然具備即此本也

# 補輯目錄

秀女禁纏足	知不足齋	林清黨犯闕	諸王奏事
歲舉秋獮	曹進喜馬進喜	紫光閣圖像	慎德堂苦次
讀祝官	懿嬪	圓明園災	同道堂
垂簾聽政	議政王	治平寶鑑	懿旨示儉
內監演戲	慎選侍從	內廷增費	安得海
停辦活計	請勤召對	修圓明園	外使覲見
代批章奏	嘉順皇后	禁結太監	慈安大喪
太監盜物	慈禧居寧壽宮	杏黃轎	修三海

李連英

修頤和園

儀鸞殿

紫光閣鐵軌

擇保醫卜

命婦供奉畫院

內府增銀

海軍報効

頤年殿

皇太后萬壽

珍妃

文海

帝居瀛臺

大阿哥

神武門入朝

西狩

保和殿筵宴

請除宦官

排雲殿祝賀

內府裁員

罷選秀女

臨幸萬牲園

紫光閣宴達賴

罷頤和園臨幸

監國攝政王

皇室大典

內帑濟軍

皇室優待

# 補輯

## 秀女禁纏足

嘉慶九年二月查出鑲黃旗漢軍入選秀女十九人俱經纏足該管參佐領等  
交部議處嗣嚴禁旗人婦女纏足

## 知不足齋

嘉慶十八年六月浙江生員鮑廷博進知不足齋叢書賞舉人仁宗有題知不  
足齋詩注云內廷知不足齋題額沿用杭州鮑氏藏書室名在毓慶宮後殿味  
餘書屋東室

## 林清黨犯闕

嘉慶十八年八月教匪林清黨陳爽等潛入內城分犯東華西華門太監劉金等引其東高廣福等引其西皇次子即宣宗見賊踰養心門遂發鳥鎗殪之再發再殪賊乃不敢踰垣將火隆宗門而禁兵入衛敗諸中正殿門外先後就捕並獲林清於黃村俱伏誅太監劉得財劉金等凌遲處死

諸王奏事

嘉慶二十一年正月諭內廷行走諸王遇有應奏事件俱在乾清門交外奏事官呈遞不准徑交內奏事太監代奏致開交結之端

歲舉秋獮

嘉慶二十一年八月諭歲舉秋獮係吾朝家法必當永遠遵行嗣後大小臣工概不得妄生浮議希圖阻止定將其人治罪不貸

曹進喜馬進喜

道光三年七月太監曹進喜私令吏部開送道府名單有違定制杖斃又五年五月太監馬進喜以在滸墅關僞稱奉旨進香交刑部治罪諭各督撫凡遇通緝太監當認真緝捕有僞稱奉差者迅即奏辦

紫光閣圖像

道光八年五月命圖平定回疆四十功臣像於紫光閣

按乾隆年平定準回平定金川皆賜功臣圖像紫光閣前後各百人合此共二百四十像

慎德堂苦次

道光二十九年十二月皇太后崩於慈寧宮上居倚廬席地寢苫諸王大臣請

還宮不允梓宮移綺春園迎暉殿自是上居慎德堂苦次次年正月行周月祭禮上不豫次日疾大漸遂崩於苦次

讀祝官

咸豐四年增置讀祝官四人故事內府讀祝官咨取太常寺贊禮郎爲之至是始定員缺

懿嬪

咸豐六年三月穆宗生於儲秀宮母懿嬪那拉氏晉封嬪妃至十一年七月以皇貴妃尊爲皇太后

圓明園災

咸豐十年八月英法兵逼通州帝狩熱河英法兵攻海淀縱火焚圓明園常嬪



薨內務府大臣文豐死之

同道堂

咸豐十一年七月文宗崩於避暑山莊預立穆宗爲皇太子定嗣位並授慈安太后以同道堂印遇頒詔旨備鈐用

垂簾聽政

咸豐十一年七月穆宗立上皇太后徽號曰慈安皇太后生母皇太后曰慈禧皇太后御史董元醇疏請皇太后垂簾聽政載垣等以本朝無太后垂簾故事抗論不可載垣端華肅順等旣以罪誅遂命議太后垂簾之儀十一月帝奉兩宮皇太后御養心殿垂簾聽政

議政王

咸豐十一年十月授恭親王奕訢爲議政王在軍機處行走同治四年三月以忤慈禧太后意命毋庸在軍機處議政旋復命仍在軍機大臣上行走毋庸復議政名目

治平寶鑑

同治元年三月命彙纂帝王政治及前代垂簾事蹟書成名治平寶鑑

懿旨示儉

同治元年十月懿旨以物力維艱誠內務府宮闈器用力行節儉又六年五月諭覈減宮廷用款又八年三月諭大婚典禮力崇節儉又十二年正月諭內務府核實撙節於歲費六十萬外不得借支

內監演戲

同治元年御史賈鐸疏聞內監演劇裁貢緞爲戲衣日賞千金請飭禁止命內務府大臣等嚴查究辦

慎選侍從

同治四年六月御史穆緝香阿請慎選侍御僕從諭內務府稽察有便辟側媚者舉實嚴懲

內廷增費

同治四年十二月允戶部請撥鹽課諸款增內廷用費三十萬兩

安得海

同治八年八月山東巡撫丁寶楨奏太監安得海矯旨出都舟過德州僭擬無度招搖煽惑得旨嚴密擒捕即就地正法旋奏於泰安拏獲正法復申諭約束

太監

按安得海實奉慈禧太后命出京丁撫請旨慈安太后特電誅之

停辦活計

同治十一年四月諭停淮關傳辦活計

請勤召對

同治十一年五月自三月初旬慈禧太后弗豫月餘不視朝御史李宏謨請勤召對諭責其冒昧嚴飭之光緒八年太后久病六月翰林院侍讀溫紹棠請皇太后勵精勤政詔以尙未康復飭之

修圓明園

同治十二年命修圓明園初御史德泰以奏請修理園庭革職至是穆宗親政

諭修圓明園備太后臨幸御史沈淮復請緩修諭令內務府僅治安佑宮爲駐蹕殿宇餘免興修十三年李光昭以報効木植欺罔論斬復諭停止圓明園工程酌量修理三海嗣復命停

### 外使覲見

同治十二年六月日俄美英荷各國駐京公使始覲見於紫光閣呈遞國書後以爲常至光緒十七年德使謂視如藩屬屢請易地始改於承光殿二十一年又改於文華殿二十四年見德親王亨利於玉瀾堂二十六年太后見各國公使夫人於儀鸞殿及二十七年兩宮回轡遂見各國公使於乾清宮復見公使暨其夫人於養性殿嗣是樂壽堂仁壽殿皇極殿海宴堂勤政殿不一其地

### 代批章奏

同治十三年十月上不豫命李鴻藻代閱章奏又命恭親王代繕批答清文摺  
件

嘉順皇后

同治十三年十二月穆宗崩懿旨封后爲嘉順皇后次年二月嘉順皇后絕食  
崩上尊諡曰孝哲毅皇后

按后爲崇綺女動必以禮不得寵於慈禧太后穆宗崩太后訓責備至后  
誓以身殉後遂不復食距大喪未百日也

禁結太監

同治十三年十二月禁內務府官結納太監又內務府大臣貴寶文錫被劾  
職又斥革太監張得喜

慈安大喪

光緒七年三月慈安皇太后崩於鍾粹宮上尊諡曰孝貞顯皇后舉辦大喪慈禧太后行禮如儀

按慈禧行禮初自居敵體禮部尙書延煦必執定制卒行禮如儀

太監盜物

光緒九年六月太監王永和盜御用衣物詔刑部按律擬罪勿株連

慈禧居寧壽宮

光緒十年慈禧太后移居寧壽宮

按寧壽宮乾隆年建爲太上皇帝尊養之所占地甚廣約當內廷四分之一  
一、規制實仿內廷各宮殿爲之初德宗立奉慈安太后居鍾粹宮慈禧太

后居長春宮就近照料慈安既崩慈禧遂移居於此遊宴日繁常傳戲焉  
杏黃轎

光緒十二年二月賞醇親王與其福晉乘坐杏黃轎

按光緒七年賞壽莊固倫公主坐黃轎即大公主也

修三海

光緒十一年五月懿旨勸修三海工程命文銛崇禮崇厚文錫報効修建十四  
年三月皇太后始幸西苑

李連英

光緒十二年八月御史朱一新以醇親王巡閱北洋總管太監李連英隨往恐  
蹈唐代監軍覆轍奏請豫防宜寺流弊懿旨以原奏有不得已苦衷一語命明



白回奏尋奏入以執謬降主事又二十年十二月御史安維峻奏參李鴻章詞連李連英並謂太后遇事掣肘何以對祖宗天下以妄言離間革職遣戍

### 修頤和園

光緒十四年二月命重修清漪園改爲頤和園備皇太后臨幸是冬以太和門災命減園工十六年御史吳兆泰請停園工命嚴議處至十七年工竣皇太后臨幸駐蹕自此始

### 儀鸞殿

光緒十四年六月皇太后幸西苑移居儀鸞殿新室

按儀鸞殿在中海時重修移駐迨庚子八國聯軍入京德將瓦德西擅入居之失慎被焚

紫光閣鐵軌

光緒十四年十一月李鴻章進火輪車五呈太后御覽於紫光閣修鐵軌試行又試火輪船於昆明湖並設電燈

擇保醫卜

光緒十九年六月命直省擇保精曉天文醫理卜筮數學及嫻於堪輿者上之內務府

命婦供奉畫院

光緒十九年命江蘇浙江織造擇保命婦之善繪事者送京供奉江蘇保送命婦繆嘉惠浙江保送命婦王韶並入內廷供奉畫院

內府增銀

光緒十九年十月命戶部歲納內務府銀五十萬

按內府歲支向有定額自慈禧太后命額外納銀闔敬銘以堅持不可而乞退此例遂破遂無限制此僅錄見於明諭者耳

### 海軍報効

光緒二十年六月命停海軍報効

按海軍報効向交內府實進獻太后願和園工程即資取於此時以中日備戰指摘海軍始有此命

### 願年殿

光緒二十年改惇叙殿爲願年殿

按惇叙殿本崇雅殿乾隆年易名太后幸西苑居此是年萬壽慶祝遂改

題額

皇太后萬壽

光緒二十年皇太后六旬萬壽先派王大臣籌備慶典援康熙乾隆年成例議定帝率中外臣工詣萬壽山行慶賀禮自大內至頤和園沿途所經臣民報効點綴景物建設經壇以中日戰起命停辦而慶辰典禮仍在宮中舉行

珍妃

光緒二十年十月太后命以瑾妃珍妃近來習尚浮華屢有乞請均降貴人二十六年七月太后出奔珍妃死於井二十七年十一月以隨扈不及殉難宮中追贈珍妃位號

文海

光緒二十二年二月御史楊崇伊奏參文廷式與太監文海結爲兄弟等情革職驅逐

按其時尙有太監寇良材勤事德宗嘗擬上書進諫太后以違制杖殺之此太監之有心者惜未見明文不克入史也

### 帝居瀛臺

光緒二十四年八月慈禧太后復訓政上居瀛臺稱疾徵醫停年節升殿筵宴郊廟祀典皆遣代至二十七年十二月西狩回鑾始親詣祀天三十四年十月上崩於瀛臺涵元殿

按兩宮臨幸頤和園帝居玉瀾堂皆臨水出入阻隔

### 大阿哥

光緒二十五年十二月詔以端郡王載漪之子溥儀爲穆宗嗣封皇子稱大阿哥命崇綺直弘德殿授讀至二十七年十月撤溥儀皇子名號

神武門入朝

光緒二十六年六月上三旬萬壽以拳匪亂東華門不啓羣臣朝賀皆自神武門入

西狩

光緒二十六年七月八國聯軍入京皇太后率帝后西狩自神武門乘車出由懷來如太原遂幸西安至次年十二月始回鑾

保和殿筵宴

光緒二十七年十二月兩宮回鑾帝始復御保和殿筵宴蒙古王公暨文武大

臣

請除宦官

光緒二十七年總督陶模疏陳請除宦官弊政

按疏上不報至宣統遜位後十年始將內監一律裁遣數千年積弊自此始絕

排雲殿祝賀

光緒三十年十月皇太后七旬聖壽上詣排雲殿進表祝賀奉皇太后御仁壽殿賜近支宗藩等宴上率王貝子貝勒公等進舞

內府裁員

光緒三十年諭裁併內務府員司

罷選秀女

光緒三十二年三月諭罷選八旗秀女

臨幸萬牲園

光緒三十三年皇太后臨幸萬牲園

按萬牲園爲三貝子花園在西直門外改建萬牲園分豢虎豹獅象等物  
紫光閣宴達賴

光緒三十四年九月達賴喇嘛覲見於仁壽殿賜宴紫光閣

罷頤和園臨幸

宣統元年隆裕皇太后懿旨嗣後罷頤和園臨幸又命度支部歲進年節另欸  
自今停止



監國攝政王

宣統元年監國攝政王班見王公百官於文華殿並定每日在乾清宮西煖閣辦事代見臣工皆賜坐

皇室大典

宣統三年閏六月命溥淪載澤會同宗人府纂擬皇室大典

內帑濟軍

宣統三年九月皇太后出內帑一百萬兩濟湖北軍需

按嗣後數月連請發款乃將內庫所存盡數發出歷代積貯遂罄

皇室優待

宣統三年十二月下詔遜位議定皇室優待條件應移居頤和園仍暫留乾清

門以內內廷宮殿爲清室起居由神武門出入而將保和殿以南外朝各殿盡畫出焉

按遜位後外朝弛禁皇城已多拆改而內廷如故惟丁巳復辟壬戌大婚兩啓東華至甲子出宮內廷各路亦經開放宮殿園囿變遷沿革別有故宮考不復詳述焉

# 金息侯 梁 刊著圖書價目表

清宮史略

一元二角

光宣小記

八角

滿洲老檔祕錄

一元二角

瓜圃叢刊叙錄

六角

瓜圃叢刊叙錄續編

六角

黑龍江通志綱要

一元二角

盛京故宮書畫錄

八元

辛亥殉難錄

一元

三希堂法帖釋文

四元

內府一統祕圖

五十元

圓明園長春園圖

四元

上海图书馆藏书



A541 212 0014 9767B

行影居  
研影  
箱刻